



CYLLIDO  
A CHYLLID

## Ymddiriedolwyr, masnachu a threth

Sut gall elusennau  
fasnachu'n gyfreithiol

COMISIWN  
ELUSENNAU



## Y Comisiwn Elusennau

Y Comisiwn Elusennau yw rheolydd annibynnol elusennau yng Nghymru a Lloegr. Ei nod yw rheoleiddio elusennau yng Nghymru a Lloegr yn y ffordd orau bosibl er mwyn cynyddu effeithiolrwydd elusennau a ffydd a hyder y cyhoedd. Mae'n rhaid i'r rhan fwyaf o elusennau gofrestru gyda'r Comisiwn, ond nid oes rhaid i rai mathau arbennig o elusennau gofrestru. Mae tua 180,000 o elusennau cofrestredig yng Nghymru a Lloegr. Mae'r fframwaith yn wahanol yn yr Alban, ac nid yw'r Comisiwn yn rheoleiddio elusennau'r Alban.

Mae'r Comisiwn yn darparu amrywiaeth helaeth o gyngor a chanllawiau i elusennau a'u hymddiriedolwyr, ac yn aml iawn gall helpu i ddatrys problemau. Mae'n rhaid i elusennau cofrestredig sydd ag incwm blynyddol o fwy na £10,000 roi gwybodaeth flynyddol i'r Comisiwn. Mae pwerau eang gan y Comisiwn i ymyrryd ym materion elusen pan fydd pethau wedi mynd o'i le.

Fe gewch fwy o wybodaeth am y Comisiwn ynghyd ag amrywiaeth o ganllawiau i elusennau ar ein gwefan **[www.charitycommission.gov.uk](http://www.charitycommission.gov.uk)**.

Gellir gweld neu lawrlwytho pob un o gyhoeddiadau'r Comisiwn y cyfeirir atynt yn y cyhoeddiad hwn ar ein gwefan.

# Cynnwys

<b>A. Cyflwyniad</b>	<b>2</b>
<b>B. Crynodeb</b>	<b>5</b>
<b>C. Elusennau sy'n masnachu</b>	<b>7</b>
<b>Ch. Elusennau gydag is-gwmniau masnachu</b>	<b>24</b>
<b>Diolchiadau</b>	<b>58</b>

# A. Cyflwyniad

## A1. Y canllaw hwn


Mae'r canllaw hwn yn esbonio pryd a sut y gall elusennau fasnachu. Mae'n ymwneud yn bennaf â masnachu at ddiben codi arian, yn hytrach na masnachu i gyflawni amcanion yr elusen. Hefyd, mae'n esbonio pryd y dylid sefydlu cwmni masnachu ar wahân i ddelio â gweithgarwch o'r fath. Fe gewch wybodaeth am godi arian drwy ddulliau eraill heblaw masnachu yng nghanllaw'r Comisiwn *Elusennau a Chodi Arian* (CC20).

Mae'r canllaw presennol hefyd yn cynnwys ychydig o wybodaeth sylfaenol am dreth incwm a threth gorfforaeth ac elw masnachu, oherwydd mae hyn yn ffactor arwyddocaol wrth bennu'r math o strwythurau sefydliadol y dylai elusennau eu mabwysiadu er mwyn masnachu at ddibenion codi arian.

Cewch wybodaeth fanwl am drethu elw masnachu a enillir gan elusennau yn [www.hmrc.gov.uk](http://www.hmrc.gov.uk), gwefan Cyllid a Thollau EM ('HMRC') - gweler yr arweiniad Masnachu a gweithgareddau busnes o fewn yr adran Nodiadau Arweiniad Manwl i Elusennau sy'n delio ag elusennau. Cyfeiriwn at yr wybodaeth hon drwy gydol y canllaw hwn.

## A2. 'Rhaid' a 'dylai': beth dym yn ei olygu?

Yn y canllaw hwn, pan ddefnyddiwn y gair '**rhaid**', golygwn fod y Comisiwn yn deall fod gofyniad cyfreithiol neu

reoleiddiol penodol sy'n effeithio ar ymddiriedolwyr neu elusen. Er mwyn eich helpu i adnabod yr adrannau hynny sy'n cynnwys gofyniad cyfreithiol neu reoleiddiol rydym wedi defnyddio'r symbol  wrth ochr yr ateb byr yn yr adran honno.

Defnyddiwn '**dylai**' am eitemau y mae'r Comisiwn yn eu hystyried yn arfer da lleiaf, ond nid oes gofyniad cyfreithiol penodol ar eu cyfer. Dylai ymddiriedolwyr ddilyn yr arweiniad arfer da oni bai fod rheswm da dros beidio â gwneud hynny.

## A3. Canllawiau blaenorol

Mae'r canllaw hwn a'i fersiwn gryno yn cymryd lle neu bydd yn cymryd lle'r canllaw blaenorol *Elusennau a Masnachu* (CC35), a gyhoeddwyd yng Ngorffennaf 2001. Yn ogystal â chael ei ysgrifennu mewn arddull gliriach, mae'r canllaw hwn yn rhoi cyngor mwy ymarferol ar elusennau sy'n buddsoddi mewn is-gwmnïau masnachu ac yn eu defnyddio, ac mae'n adlewyrchu datblygiadau yn y gyfraith a'n profiad o gynghori ar y materion.

## A4. Defnyddio'r canllaw hwn

Mae dwy brif ran i'r canllaw hwn. Y cyntaf yw Rhan C, sy'n delio â sefyllfa elusennau sy'n ymgymryd â gweithgareddau masnachu eu hunain yn uniongyrchol, neu sy'n ystyried gwneud hynny. Dilynir hyn gan Ran Ch, sy'n ymwneud ag elusennau sydd wedi sefydlu is-gwmni masnachu, neu mae angen iddynt wneud hynny.

Rhennir pob adran yn nifer o adrannau, mae pob un yn dechrau gyda chwestiwn, a rhoddir ateb cryno i'r cwestiwn ac yna esboniad mwy manwl.

## A5. Termau a Diffiniadau

Mae'r termau canlynol yn cael eu defnyddio trwy'r ddogfen hon, a dylid ystyried bod ganddynt yr ystyrion penodol fel y nodir isod.

**Adnoddau a dderbynnir o weithgareddau amrywiol.** Incwm heb fod yn incwm masnachu elusen sy'n drethadwy, ac nid yw wedi'i gynnwys gan unrhyw un o'r eithriadau treth elusen, neu nid yw wedi'i gynnwys gan unrhyw un o'r eithriadau treth ar wahân i'r eithriad ar raddfa fach.

**(Y) Comisiwn.** Y Comisiwn Elusennau.

**(Y) Comisiwn Hapchwarae.** Sefydlwyd y Comisiwn Hapchwarae o dan Ddeddf Hapchwarae 2005. Mae'r Comisiwn wedi cymryd rôl cyn Fwrdd Hapchwarae Prydain Fawr ac yn rheoleiddio casinos, bingo, peiriannau hapchwarae a loteriau.

**Cyfnod trethadwy.** Blwyddyn dreth at ddibenion treth incwm, a chyfnod cyfrifyddu at ddibenion treth gorfforaeth. Mae ymddiriedolwyr ymddiriedolaeth elusennol (yn amodol ar eithriadau elusennau) yn atebol i dalu treth incwm. Mae elusennau corfforedig a sefydliadau anghorfforedig elusennol (yn amodol ar yr eithriadau) yn atebol i dalu treth gorfforaeth.

**Deddf 1988.** Deddf Trethi Incwm a Chorfforaeth 1988.

**Deddf 1993.** Deddf Elusennau 1993.

**Dogfen lywodraethol.** Unrhyw ddogfen sy'n pennu dibenion yr elusen ac, fel arfer, y dull o'i gweinyddu. Gall fod yn Siartr Frenhinol, yn weithred ymddiriedolaeth, yn gyfansoddiad, yn femorandwm ac erthyglau cwmni, yn ewyllys, yn drawsgludiad neu'n Gynllun y Comisiwn Elusennau.

**(Yr) eithriad ar raddfa fach.** Y ddarpariaeth yn adran 46 Deddf Gyllid 2000 sy'n eithrio elw masnachu elusennau o dreth incwm a threth gorfforaeth, a hefyd peth o incwm arall elusennau, fyddai'n rhaid talu treth arno fel arall, ar yr amod nad yw'r trosiant masnachu, ynghyd ag incwm perthnasol arall, yn fwy na throthwy penodol.

**Elusen anghorfforedig.** Elusen sydd heb unrhyw fath o gorfforiad cyfreithiol. Mae'r ymddiriedolwyr eu hunain yn cynrychioli'r elusen.

**Elusen gorfforedig.** Elusen sydd wedi'i sefydlu fel cwmni, Cymdeithas Ddiwydiannol a Darbodus, neu fel math arall o gorfforaeth gorfforedig.

**Grŵp TAW.** Grŵp o sefydliadau (sy'n cynnwys is-gwmnïau a rhiant gwmnïau yn gyffredinol) sy'n cael ei drin fel un endid at ddibenion TAW.

**Gwariant anelusennol.** Gwariant gan elusen nad yw'n wariant elusennol o fewn ystyr adran 506 Deddf 1988, hy nid yw'n wariant at ddibenion elusennol yn unig. Nid yw gwneud buddsoddiadau (gan gynnwys benthyciadau, boed yn fuddsoddiadau neu beidio) yn 'wariant' fel arfer. Ond,

mewn rhai amgylchiadau, mae adran 506 yn trin gwneud benthyciadau/ buddsoddiadau fel gwariant anelusenol. Hefyd, gall taliadau i gorff a leolir y tu allan i'r Deyrnas Unedig gael eu trin yn awtomatig fel gwariant anelusenol, os yw'r elusen sy'n gwneud y taliad heb gymryd camau sy'n rhesymol yn yr amgylchiadau i sicrhau y bydd y taliad yn cael ei ddefnyddio at ddibenion elusenol.

**Gwariant elusenol.** Fe'i diffinnir yn adran 506 Deddf 1988. Mewn gwirionedd, gwariant ar ddibenion elusenol yn unig.

**HMRC.** Cyllid a Thollau Ei Mawrhydi.

**Is-gwmni masnachu.** Unrhyw gwmni masnachu anelusenol y mae elusen neu elusennau yn berchen arno i fasnachu ar ran yr elusen (neu elusennau). Drwy'r canllaw hwn ystyrir bod unrhyw gwmni o'r fath wedi'i sefydlu mewn un o wledydd y DU - Cymru, Lloegr, yr Alban neu Ogledd Iwerddon. Yn y canllaw hwn mae 'is-gwmni masnachu' yn cynnwys cwmni sydd ym mherchnogaeth lwy mwy nag un elusen, hyd yn oed os nad yw'n 'is-gwmni' unrhyw un o'r elusennau sy'n berchen arno yn dechnegol.

**Masnachu ategol.** Masnachu sy'n ategol i brif ddiben elusen, ac sy'n rhan gyfreithiol o 'fasnachu prif ddiben' yr elusen.

**Masnachu heb fod yn brif ddiben.** Masnachu nad yw'n fasnachu prif ddiben. Yn ymarferol bydd yn golygu bod masnachu'n mynd rhagddo gyda'r prif neu'r unig nod o godi arian i'r elusen.

### **Masnachu prif ddiben.**

Gweithgareddau masnachu y bydd elusen yn ymgymryd â nhw wrth gyflawni prif ddiben yr elusen. At ddibenion presennol, mae'n cynnwys masnachu lle mae'r gwaith sy'n gysylltiedig â'r masnachu yn cael ei gyflawni gan fuddiolwyr yr elusen yn bennaf. Fel rheol, bydd y math hwn o fasnachu, mewn unrhyw achos, yn mynd rhagddo wrth gyflawni prif ddiben yr elusen, ond, os mai dyma yw'r achos neu beidio, bydd y ddau fath o fasnachu yn cael ei drin mewn ffordd debyg.

**Rhiant elusen.** Yr elusen neu'r elusennau sy'n berchen ar is-gwmni masnachu.

**Rhodd Cymorth.** Mae'r cynllun hwn yn rhoi rhyddhad treth i gwmniau ac unigolion sy'n cyfrannu at elusennau. Os yw rhodd wedi cael ei roi gan unigolyn sy'n talu treth y DU, gall yr elusen hawlio ad-daliad o'r dreth (ac os yw'n atebol i dalu treth cyfradd uwch, mae'r rhoddwr yn cael rhyddhad treth ychwanegol). Os yw cwmni yn gwneud cyfraniad, mae swm y cyfraniad rhodd yn lleihau incwm trethadwy y cwmni.

**Ymddiriedolwyr.** Mae ymddiriedolwyr yn golygu ymddiriedolwyr elusen. Ymddiriedolwyr elusen yw'r bobl sy'n gyfrifol am reoli gweinyddiad yr elusen yn gyffredinol. Yn nogfen lywodraethol yr elusen gallant gael eu galw'n ymddiriedolwyr, yn ymddiriedolwyr rheoli, yn aelodau pwyllgor, yn llywodraethwyr neu'n gyfarwyddwyr, neu gall fod enw arall ganddynt.

## B. Crynodeb

O dan gyfraith Cymru a Lloegr, gall elusennau ymgymryd â rhai mathau o fasnachu.

O'i gymharu â chwmnïau masnachol arferol, mae elusennau yn mwynhau manteision sylweddol o ran treth ar gyfer masnachu ac elw masnachu. Er enghraifft, o ran TAW, mae rhai gwerthiannau a phryniannau wedi'u heithrio neu â chyfradd sero. O ran treth uniongyrchol, mae nifer o fanteision - er enghraifft:

- mae elw masnachu elusen, mewn rhai amgylchiadau, wedi'i eithrio rhag talu treth. Mae hyn yn cynnwys elw o fasnachu prif ddiben, ac elw o lotriau a rhai mathau o ddiwydiadau codi arian. Mae eithrio yn destun amodau sy'n ymwneud â defnyddio'r elw a dderbynnir gan yr elusen;
- nid yw incwm a dderbynnir gan elusen o werthu nwyddau sydd wedi cael eu rhoi iddi yn cael ei ystyried yn elw masnachu fel arfer, ac nid yw'n drethadwy.

Fodd bynnag, mae cost i'w thalu am y driniaeth ffafriol hon. Er bod rhwydd hant mwy neu lai gan elusennau i fasnachu er mwyn cyflawni eu hamcanion elusennol, mae cyfyngiadau ar fasnachu gyda'r nod o gynhyrchu arian i'r elusen. Yn arbennig, ni all elusennau ymgymryd â gweithgareddau masnachu masnachol eu natur pe byddai risg sylweddol i'w hasedau.

Os yw masnachu (heblaw masnachu i gyflawni ei hamcanion elusennol) yn cynnwys risg sylweddol i asedau'r

elusen, rhaid defnyddio is-gwmni masnachu. Ond hyd yn oed os nad yw'n **hanfodol** i is-gwmni masnachu ymgymryd â'r masnachu, gall defnyddio is-gwmnïau masnachu gynnig manteision, er enghraifft lleihau rhwymedigaethau treth. Yn arbennig, gall is-gwmnïau masnachu roi cyfraniadau i'w rhiant elusen fel 'Rhodd Cymorth', gan felly lleihau neu ddileu elw'r is-gwmni sy'n atebol i dalu treth.

Ond nid yw defnyddio is-gwmnïau masnachu os nad yw'n hanfodol i wneud hynny bob amser yn fuddiol, oherwydd gall gynnwys costau rheoli a chostau ychwanegol eraill. Gall fod anfanteision ariannol hefyd i'w pwysu a mesur yn erbyn y manteision, er mae'n bosibl nad ystyriaethau ariannol uniongyrchol yw'r unig ystyriaethau sy'n berthnasol. Gall gweithrediadau masnachu elwa o ddefnyddio is-gwmni masnachu oherwydd yr eglurder sefydliadol ac ariannol a ddaw drwy wahaniaethu rhwng gweithgaredd masnachu a phrif waith yr elusen.

Mae angen i ymddiriedolwyr elusennau sydd ag un neu ragor o is-gwmnïau masnachu fod yn ymwybodol o'u cyfrifoldebau. Yn arbennig, rhaid iddynt gofio, gyda phob penderfyniad sy'n cael ei wneud mewn perthynas ag is-gwmni masnachu, bod buddiannau'r elusen o'r pwys mwyaf. Rhaid i fuddiannau is-gwmni masnachu, ei gyfarwyddwyr, ei gredydwyr neu ei weithwyr i gyd ddod yn ail i fuddiannau'r elusen.

Pwrpas defnyddio is-gwmni masnachu yw cynnig budd i'r elusen mewn rhyw

ffordd, er enghraifft diogelu asedau'r elusen rhag risgiau masnachu, neu gynyddu lefel yr adenillion ariannol i'r elusen drwy arbed treth. Os yw asedau'r elusen yn cael eu defnyddio neu'n cael eu peryglu er budd yr is-gwmni, neu ei gyfarwyddwyr, ei gredydwyr neu ei weithwyr, effeithir ar y pwrpas hwnnw. Mewn achosion o'r fath, gall ymddiriedolwyr yr elusen fod yn atebol yn bersonol am unrhyw golled, neu leihad mewn gwerth asedau'r elusen.

Mae'r canllaw hwn yn disgrifio'r prif egwyddorion ac ystyriaethau sy'n berthnasol i fasnachu gan elusennau

eu hunain, ac i fasnachu drwy is-gwmnïau masnachu. Fodd bynnag, oherwydd cymhlethdod y gyfraith yn y maes hwn, a graddfa bosibl canlyniadau niweidiol os yw camgymeriadau'n cael eu gwneud, dylai elusennau ac ymddiriedolwyr elusennau sy'n ymgymryd â gweithrediadau masnachu sylweddol geisio cyngor annibynnol gan bobl broffesiynol gymwysedig briodol.

# C. Elusennau sy'n masnachu

## C1. Beth yw masnachu?

### Yr ateb byr

Yn anffodus, does dim ateb byr. Mae gwerthu nwyddau (gan gynnwys eiddo) neu wasanaethau yn nodwedd hanfodol o unrhyw fasnach. Fodd bynnag, mae achosion lle y gall elusennau werthu nwyddau neu wasanaethau, heb i'r gweithgarwch gael ei ystyried yn 'fasnach', a heb i'r incwm sy'n deillio gael ei drin fel elw masnachu. Mae'r gwahaniaeth hwn yn bwysig, er enghraifft, oherwydd gall elw masnachu fod yn drethadwy (gweler C4).

### Yn fwy manwl

Mae penderfynu a yw gwerthu nwyddau a gwasanaethau gan elusen yn 'fasnachu' yn dibynnu ar sawl ffactor, gan gynnwys:

- nifer ac amllder y trafodion;
- natur y nwyddau neu'r gwasanaethau sy'n cael eu gwerthu;
- beth yw bwriad yr elusen os yw'n prynu nwyddau sydd i'w gwerthu;
- a oes modd i'r elusen sy'n eu gwerthu ddefnyddio'r nwyddau a'u mwynhau;
- natur a dull gwerthiannau; a
- phresenoldeb neu absenoldeb cymhelliad i wneud elw.

Ond nid yw'r ffaith bod gwerthu nwyddau, gwasanaethau ac eiddo yn hybu amcanion yr elusen, neu fod elw masnachu yn cael ei ddefnyddio i hybu'r amcanion hyn, yn atal gweithgarwch rhag cael ei ystyried yn 'fasnachu'.

Nid yw'r gweithgareddau canlynol yn cael eu hystyried yn 'fasnachu' fel rheol, ac nid yw'r incwm sy'n deillio ohonynt yn cael ei ystyried yn elw masnachu:

- gwerthu neu osod nwyddau a roddwyd i elusen at ddiben gwerthu neu osod (gweler C3);
- gwerthu buddsoddiadau;
- gwerthu asedau y mae'r elusen yn eu defnyddio, neu wedi'u defnyddio, ar gyfer ei dibenion elusennol; a
- gosod tir ac adeiladau pan nad yw unrhyw wasanaethau yn cael eu darparu i'r defnyddiwr.

Os yw elusen yn masnachu, mae'r elw masnachu, mewn egwyddor, yn agored i dreth gorfforaeth (neu dreth incwm yn achos ymddiriedolaethau elusennol), heblaw'r eithriadau penodol. Gweler C4 am wybodaeth bellach.

## Gwybodaeth bellach

Dylech gyfeirio at wefan HMRC a'r canllaw Masnachu a gweithgareddau busnes i gael mwy o wybodaeth am elusennau sy'n masnachu.

Pan fydd elusen yn gosod eiddo, fel rheol bydd angen i'r ymddiriedolwyr geisio cyngor syrfêwr cymwysedig ynglŷn â rhent priodol ar gyfer yr

eiddo: gweler canllaw'r Comisiwn *Gwerthiannau, prydles, trosglwyddiadau neu forgeisiau*: *Yr hyn y mae angen i ymddiriedolwyr wybod am waredu tir elusennau* (CC28). Os yw gwasanaethau yn cael eu darparu i'r defnyddiwr, gall gosod o'r fath gael ei ystyried yn fusnes eiddo, a fyddai'n cael ei ystyried yn 'fasnachu'.

## C2. Pa fath o fasnachu all elusennau ymgymryd ag ef?

### Yr ateb byr

Gall elusennau ymgymryd â gweithgareddau masnachu sy'n cyfrannu'n uniongyrchol at hybu eu hamcanion elusennol, neu (os mai'r diben yw codi arian i'r elusen) sydd heb beri risg sylweddol.

### Yn fwy manwl

Mae'r gyfraith elusennau yn caniatáu i elusennau fasnachu ar yr amod bod masnachu wedi'i gynnwys mewn un o'r categorïau canlynol:

- 'masnachu prif ddiben' (gweler C6);
- 'masnachu ategol' (gweler C7); a
- 'masnachu heb fod yn brif ddiben' nad yw'n beri risg sylweddol i adnoddau'r elusen (gweler C8).

Sylwer, deallir fel rheol bod y trydydd categori masnachu a restrir uchod, 'masnachu heb fod yn brif ddiben' nad yw'n creu risg sylweddol i adnoddau'r elusen, yn cynnwys:

- cynnal lotriâu, yn destun amodau (gweler C11); a
- masnachu o fewn telerau'r 'eithriad ar raddfa fach' (gweler C12).

Ond gall hefyd gynnwys mathau eraill o fasnachu: mae'n dibynnu ar yr amgylchiadau.

### Gwybodaeth bellach

Mae canllaw'r *Comisiwn Darparu Alcohol ar Safleoedd Elusennau* (CC27) yn rhoi gwybodaeth bellach am werthu alcohol ar safleoedd elusennau.

### C3. Ydy gwerthu neu hurio nwyddau a roddwyd yn 'fasnachu'?

#### Yr ateb byr

Nac ydy. Fel rheol os yw elusen yn gwerthu, neu'n gosod ar log nwyddau a roddwyd iddi gyda'r bwriad y dylid eu gwerthu (neu eu gosod) nid yw hyn yn 'fasnachu'. Ni ystyrir bod yr incwm sy'n deillio felly yn elw masnachu ac nid yw treth gorfforaeth yn daladwy (neu dreth incwm yn achos ymddiriedolaethau elusennol). Mae gwerthiannau o'r fath yn gyfradd sero at ddibenion TAW.

---

#### Yn fwy manwl

Ni ystyrir bod gwerthu neu osod nwyddau a roddwyd yn 'fasnachu'. Mae'n weithgarwch busnes at ddibenion TAW, ac mae gwerthu neu osod o'r fath wedi'i gynnwys o fewn TAW. Fodd bynnag, mae gwerthiannau yn gyfradd sero os caiff y nwyddau eu gwerthu neu eu gosod drwy siopau elusennau, neu drwy arwerthiannau elusennol neu ddigwyddiadau tebyg, i'r cyhoedd, pobl anabl neu bobl sy'n derbyn rhai budd-daliadau arbennig, neu os cânt eu hallforio. Gall gwerthu neu osod nwyddau a roddwyd gan is-gwmni masnachu fod yn gyfradd sero hefyd (gweler Rhan Ch, yn arbennig Ch13).

Os yw nwyddau a roddwyd i elusen gyda'r nod o'u gwerthu yn cael eu haddasu neu eu gwella'n sylweddol cyn eu gwerthu, er enghraifft drwy droi deunyddiau crai a roddwyd yn nwyddau gorffenedig, gwerthadwy, gall yr elw o werthiannau o'r fath gael ei drin fel elw masnachu, a gall effeithio ar y modd y caiff ei drin at ddiben TAW. Fodd bynnag, nid yw didoli a glanhau eitemau, neu wneud mân atgyweiriadau iddynt, yn gwneud yr elw sy'n deillio o'u gwerthu yn elw masnachu.

Gweler hefyd C10.

## C4. Oes rhaid i elusennau dalu treth ar elw masnachu?



### Yr ateb byr

Oes. Mae elw masnachu, a pheth incwm elusen o ffynonellau eraill, yn agored i dreth gorfforaeth (neu dreth incwm yn achos ymddiriedolaethau elusennol) oni bai ei fod wedi'i eithrio'n benodol.

### Yn fwy manwl

Mae elw masnachu elusennau wedi'i eithrio o dreth gorfforaeth (neu dreth incwm yn achos ymddiriedolaethau elusennol) os yw'r masnachu yn:

- 'fasnachu prif ddiben' (gweler C6);
- 'masnachu ategol' (gweler C7);
- o fewn telerau 'eithriad ar raddfa fach' (gweler C12).
- loteri (gweler C11); neu
- yn gysylltiedig â digwyddiadau codi arian arbennig (gweler C13).

Ym mhob un o'r achosion hyn mae'r eithriad yn destun i'r amod bod elw yn cael ei ddefnyddio at ddibenion yr elusen yn unig.

Dylech nodi hefyd nad yw gwerthu neu hurio nwyddau a roddwyd at y diben hwnnw yn 'fasnachu' fel rheol ac nid yw incwm o'r gweithgarwch hwn yn agored i dreth incwm neu dreth gorfforaeth (gweler C3).

Nid yw'r rhan fwyaf o fathau o incwm elusen - heblaw elw masnachu - naill ai'n agored i dreth incwm neu dreth gorfforaeth o gwbl, neu'n gymwys ar gyfer eithriadau cyffredinol, ar yr amod

bod yr incwm yn cael ei ddefnyddio at ddibenion elusennol yn unig. Ond mae rhai mathau o incwm heb fod yn fasnachu (a ddisgrifir yn dechnegol fel 'adnoddau a dderbynnir o weithgareddau amrywiol') yn drethadwy. Mewn rhai achosion gall yr 'eithriad ar raddfa fach' fod ar gael, mewn eraill nid oes unrhyw eithriad o gwbl. Mae enghreifftiau o 'adnoddau a dderbynnir o weithgareddau amrywiol' yn cynnwys:

- incwm o warantu cyfranddaliadau (ac eithrio pan fydd hyn yn cael ei wneud yn gyson, ac mae'n debygol o gael ei drin fel masnachu); ac
- enillion sy'n codi ar werthu tir, sy'n cael eu trin at ddibenion treth fel incwm yn hytrach na chyfalaf, oherwydd prynwyd y tir yn benodol gyda'r nod o gael elw ar werthu, neu oherwydd bod y tâl ar gyfer gwerthu wedi'i strwythuro'n llwyr neu'n rhannol drwy gyfeirio at elw'r datblygiad dilynol o'r tir gan y prynwr.

Gall fod yn fuddiol i'r elusen ymgymryd â busnes mewn is-gwmni masnachu y disgwylir iddo gynhyrchu adnoddau a

dderbynnir o'r natur hon, oherwydd gall atebolrwydd yr is-gwmni i dalu treth gorfforaeth gael ei leihau neu ei ddileu fel y nodir yn Ch4.

Fodd bynnag, mae'r canllaw hwn yn ymwneud ag elusennau a masnachu yn bennaf, nid sut y gall elusennau leihau eu hatebolrwydd i dalu treth. Dylid ceisio cyngor proffesiynol cyn bod

elusen yn neilltuo gweithgareddau heb fod yn weithgareddau masnachu o'r natur hon i is-gwmni masnachu.

### **Gwybodaeth bellach**

Cewch fwy o wybodaeth am atebolrwydd elusennau i dalu treth ar wefan HMRC.

## **C5. Oes rhaid i elusennau godi TAW ar werthiannau?**

### **C**

#### **Yr ateb byr**

Oes. Rhaid i elusennau sydd wedi'u cofrestru ar gyfer TAW godi TAW ar werthiannau cyfradd safonol/gostyngol yn yr un ffordd â sefydliadau eraill, ond mae rhai darpariaethau penodol ar gyfer cyfradd sero neu eithriadau, sy'n gymwys i elusennau, neu i rai elusennau, ond nid i sefydliadau eraill, neu nid i bob sefydliad arall.

#### **Yn fwy manwl**

Mae TAW yn daladwy ar werthu nwyddau gan elusennau ar yr un sail ag y byddai'n gymwys i sefydliadau masnachol, oni bai fod darpariaethau penodol ar gyfer cyfradd sero neu eithriad yn gymwys. Mae nifer o ddarpariaethau o'r fath yn gymwys i rai elusennau, i elusennau yn gyffredinol, neu i ddsbarth o gyflenwr sy'n cynnwys rhai elusennau neu elusennau yn gyffredinol. Mae'r canlynol yn enghreifftiau o'r hyn sy'n cael triniaeth arbennig:

- mae gwerthu neu hurio nwyddau a

roddwyd i elusennau at y diben hwnnw yn gyfradd sero ar gyfer TAW (gweler C3); ac

- mae gwerthu nwyddau neu wasanaethau mewn rhai digwyddiadau codi arian elusennau wedi'i eithrio o TAW (gweler C13).

### **Gwybodaeth bellach**

Cewch fwy o wybodaeth am atebolrwydd elusennau i dalu treth ar wefan HMRC. Mae maes TAW yn un cymhleth, a dylai unrhyw elusen sy'n gwerthu geisio cyngor arbenigwr treth.

## C6. Beth yw 'masnachu prif ddiben'?

### Yr ateb byr

Mae 'masnachu prif ddiben' yn fasnachu sy'n cyfrannu'n uniongyrchol at un neu fwy o amcanion elusen fel y nodwyd yn ei dogfen lywodraethol. At ddibenion presennol, mae'n cynnwys masnachu lle mae'r gwaith sy'n gysylltiedig â'r masnachu yn cael ei wneud gan fuddiolwyr yr elusen yn bennaf, oherwydd bydd hynny'n fasnachu prif ddiben fel rheol. Os yw felly neu beidio, mae'r gyfraith elusennau a'r rheolau treth yn debyg.

### Yn fwy manwl

Mae enghreifftiau cyffredin o fasnachu prif ddiben yn cynnwys:

- ysgol neu goleg elusennol yn darparu gwasanaethau addysgol yn gyfnewid am ffioedd cyrsiau;
- gwerthu nwyddau a gynhyrchwyd gan bobl anabl sy'n fuddiolwyr elusen i'r anabl;
- oriel gelf neu amgueddfa elusennol yn cynnal arddangosfa celf yn gyfnewid am ffioedd mynediad;
- elusen gofal preswyl yn darparu llety preswyl yn gyfnewid am dâl;
- theatr elusennol yn gwerthu tocynnau am gynhyrchiad theatrig sydd i'w lwyfannu gan yr elusen;
- oriel gelf neu amgueddfa elusennol yn gwerthu nwyddau addysgol arbennig.

Mae'r elw o fasnachu prif ddiben wedi'i eithrio o dreth gorfforaeth (neu dreth incwm yn achos

ymdiriedolaethau elusennol). Mae'r eithriad hwn rhag talu treth ar gael dim ond os yw'r elw yn cael ei ddefnyddio at ddibenion yr elusen yn unig. Fodd bynnag, bydd y gwerthiannau y mae'r elw hwnnw wedi deillio ohonynt yn cael eu hystyried yn weithgarwch busnes at ddibenion pennu atebolrwydd i dalu TAW.

### Gwybodaeth bellach

Bydd HMRC Elusennau yn cynghori ymdiriedolwyr a yw gweithgarwch arbennig, yn eu barn nhw, wedi'i gynnwys o fewn y diffiniad o fasnachu prif ddiben. Ond os oes unrhyw amheuaeth neu anhawster mae'n bosibl y bydd angen i ymdiriedolwyr ymgynghori â'u cynghorwyr proffesiynol eu hunain hefyd.

## C7. Beth yw 'masnachu ategol'?

### Yr ateb byr

Mae 'masnachu ategol' yn cyfrannu'n anuniongyrchol at hybu dibenion yr elusen yn llwyddiannus. Mae hyn yn cael ei drin fel rhan o 'fasnachu prif ddiben' at ddibenion y gyfraith elusennau a threth.

---

### Yn fwy manwl

Enghraifft o fasnachu ategol yw elusen theatrig sy'n gwerthu bwyd a diod mewn bwyty neu far i aelodau'r gynulleidfa. Gall lefel y trosiant blynyddol mewn masnachu yr ystyrir ei fod yn ategol ddylanwadu ar y cwestiwn a yw'r masnachu yn ategol mewn gwirionedd, ond nid oes unrhyw lefel benodol o drosiant blynyddol wedi'i phennu pan na fydd masnachu sydd y tu hwnt i'r lefel yn cael ei

ystyried yn bendant fel masnachu ategol. Nid yw masnachu yn cael ei ystyried yn ategol i gyflawni prif ddiben yr elusen dim ond oherwydd mai codi arian i'r elusen yw ei ddiben.

### Gwybodaeth bellach

Cewch fwy o fanylion ar wefan HMRC a'r canllaw Masnachu a gweithgareddau busnes o fewn yr adran 'Elusennau'.

## C8. Beth yw 'masnachu heb fod yn brif ddiben', a phryd all elusennau wneud hyn?

### Yr ateb byr

Mae 'masnachu heb fod yn brif ddiben' yn fasnachu sy'n bwriadu codi arian i'r elusen, yn wahanol i fasnachu sydd ynddo'i hun yn hybu amcanion yr elusen. Gall elusennau ymgymryd â masnachu o'r fath dim ond os nad oes unrhyw risg sylweddol.

### Yn fwy manwl

Mae'r gyfraith elusennau yn caniatáu i elusennau ymgymryd â masnachu heb fod yn brif ddiben er mwyn codi arian, ar yr amod nad yw masnachu yn cynnwys unrhyw risg sylweddol i asedau'r elusen.

Y 'risg sylweddol' i'w osgoi yma yw bod y trosiant yn annigonol i dalu costau masnachu, a rhaid talu am y gwahaniaeth o asedau'r elusen.

Er nad dyma yw'r achos o anghenraid, fel rheol byddai hawl ddigolledu gan gredydwyr masnach i unrhyw asedau'r elusen, os oedd gan yr asedau hynny unrhyw gysylltiad â'r masnachu neu beidio. Gallai'r lleihad dilynol yn asedau'r elusen atal yr elusen rhag gallu parhau i wasanaethu'r gymuned mor effeithiol ag y gallai fod wedi'i wneud fel arall, neu ddim o gwbl.

Mae'n debyg bod y rhai a ddarparodd asedau'r elusen yn disgwyl y byddai'r asedau hynny yn cael eu defnyddio i hybu dibenion yr elusen, neu eu buddsoddi'n ddoeth, ac ni fyddent yn cael eu peryglu mewn gweithgareddau masnachu gyda'r nod syml o godi mwy o arian.

Mae penderfynu a yw'r risg o fasnachu heb fod yn brif ddiben yn 'sylweddol' neu beidio yn dibynnu ar sawl ffactor, gan gynnwys:

- maint yr elusen;
- natur y busnes;
- y treuliau disgwylidig;
- rhagamcaniadau o'r trosiant; a
- sensitifrwydd proffidioldeb y busnes i ddringo a disgyn yn y farchnad.

Yn anochel, bydd asesu difrifoldeb y risg yn cynnwys elfen o farn ar ran yr ymddiriedolwyr a'u cyngorwyr. Fodd bynnag, yn gyffredinol, gall loteri, neu fasnach sy'n gymwys ar gyfer 'yr eithriad ar raddfa fach' (gweler C12) gael ei ystyried yn weithgarwch nad yw'n cynnwys risg sylweddol.

Nid oes unrhyw eithriad cyffredinol rhag talu treth gorfforaeth (neu dreth incwm yn achos ymddiriedolaethau elusennol) ar elw masnachu heb fod yn brif ddiben a gyflawnir gan elusen, hyd yn oed os yw'r elw i gyd yn cael ei ddefnyddio at ddibenion yr elusen.

Fodd bynnag, mae rhai eithriadau yn gymwys, hy yr eithriad lotriau (gweler C11), yr 'eithriad ar raddfa fach' (gweler C12), a'r eithriad codi arian (gweler C13).

Os hoffai elusennau ymgymryd â masnachu heb fod yn brif ddiben sy'n

cynnwys risg sylweddol, rhaid iddynt wneud hynny drwy is-gwmni masnachu, fel y nodir yn Rhan Ch. Mae hyn yn trafod a fyddai'r elw masnachu, pe bai'r elusen ei hun yn ymgymryd â'r masnachu, wedi'i eithrio rhag talu treth.

## C9. Beth os yw masnachu yn cynnwys elfennau 'prif ddiben' a 'heb fod yn brif ddiben'?

### C

Enghraifft o'r math hwn o fasnachu yw siop sy'n cael ei rhedeg gan elusen sy'n darparu oriel gelf gyhoeddus, a all werthu amrywiaeth o nwyddau, rhai'n gysylltiedig â hybu prif ddiben yr elusen (ee llyfrau sy'n ymwneud â'r arddangosfa, copïau o baentiadau'r elusen), a rhai sydd heb fod yn gysylltiedig (ee, pennau, mygiau a llieniau hyrwyddol).

Er y bydd un fasnach yn unig gan elusen yn gyffredinol, at ddibenion treth rhaid trin y math hwn o weithgarwch masnachu prif ddiben a heb fod yn brif ddiben cymysg fel dwy fasnach ar wahân, ac mae'r rheolau sy'n gymwys i fasnachu prif ddiben a heb fod yn brif ddiben yn gymwys i bob un ar wahân. Rhaid cael dosraniad rhesymol o dreuliau a derbyniadau rhwng y masnachau y tybir eu bod ar wahân.

Mae'r driniaeth hon yn newydd ac yn gymwys i gyfnodau cyfrifyddu sy'n dechrau ar neu ar ôl 22 Mawrth 2006. Cyn hynny roedd y math hwn o fasnachu yn cael ei drin fel prif ddiben yn llwyr neu heb fod yn brif ddiben yn llwyr, yn dibynnu ar faint yr elfen heb fod yn brif ddiben. Bydd angen i ymddiriedolwyr elusennau sy'n ymgymryd â'r math hwn o fasnachu ystyried a yw unrhyw ailstrwythuro yn ddymunol.

## C10. Beth os yw nwyddau a roddwyd yn cael eu gwerthu gyda nwyddau eraill?



### Yr ateb byr

Nid yw gwerthu nwyddau sydd wedi cael eu rhoi i elusen yn fasnachu. Pan fydd nwyddau a roddwyd yn cael eu gwerthu gyda nwyddau eraill y mae eu gwerthu yn cael eu hystyried yn fasnachu, rhaid i'r incwm o werthu nwyddau a roddwyd fod ar wahân i'r elw masnachu.

### Yn fwy manwl

Ni ystyrir bod gwerthu neu osod nwyddau a roddwyd yn fasnachu (gweler C3). Rhaid bod modd adnabod incwm o werthu neu osod nwyddau a roddwyd ar wahân mewn cofnodion yr elusen o'r elw masnachu. Rhaid ystyried masnachu cysylltiedig ar wahân, boed yn 'fasnachu prif ddiben' (gweler C6 a C7), neu 'fasnachu heb fod yn brif ddiben' (gweler C8).

Gallai'r sefyllfa hon godi mewn siop elusen sy'n cael ei rhedeg gan elusen sydd â'r nod o wella sgiliau pobl anabl. Er enghraifft, gallai'r siop werthu:

- llyfrau, CDs a fideos a roddwyd i'w gwerthu - nid masnachu;
- teganau pren wedi'u gwneud gan bobl anabl - 'masnachu prif ddiben'; a

- theganau meddal wedi'u prynu i mewn - 'masnachu heb fod yn brif ddiben' gyda'r unig ddiben o godi arian.

Yn yr achos hwn, yr unig fasnachu sy'n mynd rhagddo yw masnachu teganau pren a theganau meddal. Mae'r fasnach hon yn cael ei rhannu'n elfennau prif ddiben a heb fod yn brif ddiben, fel y nodwyd yn C9.

### Gwybodaeth bellach

Os yw ymddiriedolwyr yn bryderus am oblygiadau treth busnes o'r natur hon, dylid ceisio cyngor proffesiynol, neu dylid cysylltu â HMRC Elusennau am wybodaeth. Gall fod yn ddefnyddiol hefyd i ymddiriedolwyr gyfeirio at y canllaw masnachu ar wefan HMRC.

## C11. Ydy cynnal loteri yn cael ei ystyried yn ‘fasnachu’?



### Yr ateb byr

Ydy. Mae cynnal loteri yn cael ei ystyried yn fasnachu. Fodd bynnag, yn destun amodau, caniateir i elusennau gynnal lotriau ac mae’r elw o lotriau o’r fath wedi’u heithrio rhag talu treth.

### Yn fwy manwl

Ni ystyrir bod hybu a chynnal loteri yn unol â naill ai adran 3 neu adran 5 Deddf Loteriau a Difyrion 1976 yn groes i gyfyngiadau’r gyfraith elusennau ar fasnachu heb fod yn brif ddiben, oherwydd mae unrhyw risg i asedau’r elusen sy’n deillio o ymgymryd â’r math hwn o fasnachu yn ddibwys.

Mae’r elw o loteri sy’n cael ei hybu a’i chynnal gan elusen wedi’i eithrio o dalu treth gorfforaeth (neu dreth incwm yn achos ymddiriedolaethau elusennol), ar yr amod bod:

- y loteri yn cael ei hybu a’i chynnal yn unol â naill ai adran 3 neu adran 5; ac
- mae’r elw o’r loteri yn cael ei ddefnyddio at ddibenion yr elusen yn unig.

Rhaid i loteri adran 3, a elwir hefyd yn ‘loteri fach’, gadw at yr amodau hyn:

- rhaid iddi fod yn wirioneddol ategol i’r hyn a elwir yn Neddf 1976 yn ‘ddifyrion wedi’u heithrio’, gan gynnwys garddwesti, ffeiriau sborion, arwerthiannau, ac ati;
- ni all cyfanswm gwerth y gwobrau fod yn fwy na £250;
- rhaid i’r derbyniadau o’r loteri gael eu defnyddio ar gyfer y dibenion heblaw budd preifat;
- ni ellir rhoi unrhyw wobrau arian parod; a
- rhaid i werthu a dosbarthu tocynnau a chyhoeddi’r canlyniadau ddigwydd yn ystod yr adloniant ac ar y safle lle y’i cynhelir.

Mae loteri adran 5, a elwir hefyd yn ‘loteri cymdeithas’ wedi’i rheoleiddio’n fwy caeth, a gellir gwahodd y cyhoedd i gymryd rhan. Gall loteri o’r fath gael ei chynnal gan gorff sydd wedi

cofrestru gyda'r Comisiwn Hapchwarae, neu'r awdurdod lleol, yn dibynnu ar faint busnes y loteri. Gall elusennau ac is-gwmnïau masnachu geisio cofrestru.

Os yw is-gwmni masnachu, yn hytrach na'r elusen ei hun, wedi'i gofrestru fel y 'gymdeithas' o dan adran 5 Deddf 1976, bydd yn hybu ac yn cynnal y

loteri, ac nid oes unrhyw driniaeth treth arbennig ar gyfer unrhyw elw'r fasnach.

Mae darpariaethau Deddf 1976 y cyfeirir atynt uchod wedi cael eu disodli gan y Ddeddf Hapchwarae 2005 gyda darpariaethau cyfatebol. Nid yw'r darpariaethau olaf mewn grym eto.

## C12. Beth yw'r eithriad ar raddfa fach?

### Yr ateb byr

Mae'r eithriad ar raddfa fach hon yn eithriad o dalu treth gorfforaeth (neu dreth incwm yn achos ymddiriedolaethau elusennol) ar elw masnachu heb fod yn brif ddiben ar raddfa fach a'r incwm o rai gweithgareddau busnes eraill y bydd elusennau yn ymgymryd â nhw. Mae'n gymwys dim ond os yw'r holl elw neu incwm perthnasol yn cael eu defnyddio at ddibenion yr elusen. Nid yw'n gymwys os yw'r elw masnachu neu incwm arall wedi'i eithrio o dalu treth ar ryw sail arall.

### Yn fwy manwl

Mae'r eithriad ar raddfa fach yn gymwys i elw o fasnachu heb fod yn brif ddiben, a hefyd incwm arall sydd wedi'i gynnwys yn y categori 'adnoddau a dderbynnir o weithgareddau amrywiol.' Er mwyn bod yn gymwys ar gyfer yr eithriad ar raddfa fach o fewn cyfnod trethadwy penodol, naill ai:

- ni all trosiant blyneddol masnachu heb fod yn brif ddiben perthnasol yr elusen, a hefyd 'adnoddau a dderbynnir o weithgareddau amrywiol' a all fod yn gymwys ar gyfer eithriad, fod yn fwy na'r 'trothwy perthnasol' yn ystod y cyfnod trethadwy; neu

- os yw'n **fwy** na'r 'trothwy perthnasol', rhaid iddo fod yn rhesymol i'r elusen ddisgwyl ar ddechrau'r cyfnod trethadwy na fyddai'n fwy na'r lefel honno.

Ni ddylid cyfrif trosiant masnachu, y mae ei elw yn destun eithriadau treth penodol, megis masnachu sy'n gysylltiedig â digwyddiadau codi arian (gweler C13), wrth benderfynu beth yw'r 'trothwy perthnasol'. Ni ddylid cyfrif 'adnoddau a dderbynnir o weithgareddau amrywiol' ychwaith na fyddant o bosibl yn gymwys ar gyfer yr eithriad ar raddfa fach.

Mae'r tabl isod yn dangos sut y cyfrifir y trothwy perthnasol. Mae'n cymryd nad oes gan yr elusen unrhyw 'adnoddau a dderbynnir o weithgareddau amrywiol' perthnasol yn y cyfnod trethadwy a fyddai'n gymwys ar gyfer yr eithriad.

Cyfanswm yr holl adnoddau a dderbynnir mewn cyfnod trethadwy arbennig yr elusen	Uchafswm trosiant blynyddol a ganiateir ar gyfer fasnach berthnasol yn y cyfnod trethadwy hwnnw
Llai na £20,000	£5,000
£20,000 i £200,000	25% o gyfanswm adnoddau a dderbynnir yr elusen
Dros £200,000	£50,000

Nid oes unrhyw ddiffiniad statudol o'r 'holl adnoddau a dderbynnir'. Ond mae HMRC Elusennau yn ystyried ei fod yn golygu bod cyfanswm derbyniadau'r elusen am y cyfnod trethadwy o bob ffynhonnell - grantiau, cyfraniadau, incwm o fuddsoddiadau, derbyniadau masnachu etc - wedi'i gyfrifo yn unol â rheolau cyfrifyddu arferol elusennau.

Os yw trosiant y fasnach berthnasol (wedi'i gymryd gyda'r 'incwm o weithgareddau amrywiol' perthnasol) yn fwy na'r lefel uchaf (fel y nodwyd

yn y golofn ar y dde yn y tabl uchod) nid yw'r eithriad ar raddfa fach yn gymwys oni bai ei fod yn rhesymol i'r elusen ddisgwyl ar ddechrau'r cyfnod trethadwy na fyddai'n fwy na'r lefel honno.

Nid yw masnachu elusen y mae ei drosiant wedi'i gynnwys o fewn cwmpas yr eithriad ar raddfa fach yn debygol o fod yn groes i gyfyngiadau'r gyfraith elusennau ar fasnachu heb fod yn brif ddiben (gweler C8). Mae uchafswm isel y lefel trosiant masnachu a ganiateir yn golygu bod unrhyw risg i adnoddau'r elusen o'r fasnach yn debygol o fod yn fach.

Felly, oni bai y gwaherddir hyn gan ei dogfen lywodraethol, gall unrhyw elusen ymgymryd â masnachu heb fod yn fasnachu prif ddiben, ar raddfa fach, a chael ei heithrio rhag talu treth gorfforaeth (neu dreth incwm yn achos ymddiriedolaethau elusennol) ar yr elw, ar yr amod bod yr elw yn cael ei ddefnyddio at ddibenion yr elusen.

### **Gwybodaeth bellach**

Cewch fwy o fanylion am yr eithriad ar wefan HMRC a'r canllaw Masnachu a gweithgareddau busnes o fewn yr adran 'Elusennau'. Os yw ymddiriedolwyr yn ansicr ynghylch yr eithriad dylent gysylltu â HMRC Elusennau.

## C13. Pa fanteision treth sy'n gymwys i ddigwyddiadau codi arian?

### Yr ateb byr

Mae cyflenwi nwyddau neu wasanaethau mewn neu mewn perthynas ag ystod eang o ddigwyddiadau codi arian wedi'i eithrio rhag talu TAW, ac mae elw masnachu wedi'i eithrio rhag talu treth gorfforaeth (neu dreth incwm yn achos ymddiriedolaethau elusennol), yn destun i amodau caeth.

### Yn fwy manwl

- Mae rhai eithriadau treth arbennig yn gymwys i werthiannau/incwm mewn neu mewn perthynas â digwyddiadau sydd wedi'u cynnwys o fewn telerau Grŵp 12 Atodlen 9 Deddf TAW 1994. Cyfeiriwn at y digwyddiadau hyn fel 'digwyddiadau cymwys.' Maent yn destun yr amodau canlynol:
- rhaid i'r digwyddiad gael diben elusennol;
- rhaid i'r digwyddiad gael ei drefnu gan elusen, neu is-gwmni masnachu (gweler Rhan Ch) neu gorff cymwys arall, er budd yr elusen ei hun;
- nid yw masnachu'n mynd rhagddo drwy gyfres o ddigwyddiadau (digwyddiadau lluosog - megis, dyweder, cinio a dawns wythnosol rheolaidd);
- ni ddarperir llety ar gyfer y digwyddiad am fwy na 2 noson yn olynol;
- ni all elusen (gan gynnwys is-gwmni masnachu'r elusen) neu gorff cymwys gael mwy na 15 digwyddiad

o'r un fath ym mlwyddyn ariannol yr elusen mewn unrhyw leoliad.

(Sylwch os yw elusen yn cynnal mwy na 15 digwyddiad o'r un fath yn yr un lleoliad yn ystod ei blwyddyn ariannol, ni fydd unrhyw un o'r digwyddiadau yn gymwys ar gyfer eithriad.)

Nid oes unrhyw gyfyngiadau o ran natur y digwyddiad. Nid yw'r rhestr ganlynol, sy'n rhoi enghreifftiau o ddigwyddiadau y gellir eu cynnal at ddibenion codi arian, a lle y gall elw o fasnachu achlysurol gael ei eithrio o dalu treth gorfforaeth (neu dreth incwm yn achos ymddiriedolaethau elusennol), a lle y gall gwerthiannau gael eu heithrio rhag talu TAW, yn derfynol.

- dawnsiau, er enghraifft, dawnsiau mawreddog, cinio a dawns, disgo neu ddawnsiau gwerin;
- perfformiadau byw, er enghraifft, cyngherddau, cynyrchiadau theatrig, bale, perfformiadau gymnastig, sioeau pypedau a digwyddiadau tebyg gyda chynulleidfia sy'n talu;

- dangos ffilm, fideo neu DVD;
- garddwesti, ffeiriau a gwyliau;
- sioeau garddwriaethol;
- arddangosfeydd, er enghraifft, gwrthrychau o ddiddordeb artistig, hanesyddol, diwylliannol, addysgol, crefyddol, gwyddonol, mecanyddol, chwaraeon, ecolegol neu amgylcheddol;
- basarau, ffeiriau sborion, arwerthiannau cist car ac arwerthiannau nwyddau fel newydd;
- gemau o sgil, gwybodaeth neu allu, gan gynnwys gornestau a chwisiau;
- arddangosiadau tân gwyllt;
- prydau, megis ciniawau, cinio canol dydd, te a barbiciw;
- arwerthiannau o nwyddau a roddwyd; (Sylwch mae nwyddau a roddwyd yn gyfradd sero ar gyfer TAW, ac nid wedi'u heithrio, ac mae hyn yn golygu bod modd adennill TAW ar gostau sy'n gysylltiedig â'r gwerthiant; gall nwyddau a roddwyd mewn digwyddiadau fod yn gymwys ar gyfer cyfradd sero, yn wahanol i eithriad);
- arwerthiannau o nwyddau wedi'u prynu i mewn (a all ddenu TAW).

Mae'r eithriadau treth canlynol yn berthnasol i ddigwyddiadau cymwys o'r fath:

- mae nwyddau neu wasanaethau a werthir gan elusen neu is-gwmni masnachu wrth fasnachu mewn, neu mewn perthynas â, digwyddiad cymwys wedi'u heithrio rhag talu TAW; ac

- mae'r elw o werthiannau o'r fath gan elusen (ond nid gan is-gwmni masnachu) wedi'i eithrio o dalu treth gorfforaeth (neu dreth incwm yn achos ymddiriedolaethau elusennol) ar yr amod eu bod yn cael eu defnyddio at ddibenion elusennol yn unig.

Nid oes unrhyw derfynau trosiant i'r eithriad hwn. Felly, mae ganddo'r posibilrwydd o ddarparu rhyddhad rhag talu treth ar gyfer elw o fasnachu sylweddol. Mewn rhai achosion gallai masnachu sylweddol o'r fath gynnwys risg sylweddol i asedau'r elusen sy'n ymgymryd â'r fasach. Byddai hyn yn groes i'r egwyddor na all 'masnachu heb fod yn brif ddiben' gynnwys risg sylweddol, fel y nodir yn C8.

Mewn achosion o'r fath os oes risg sylweddol yn gysylltiedig â digwyddiad codi arian elusen, rhaid i'r digwyddiad gael ei gynnal gan is-gwmni masnachu, ac nid gan yr elusen ei hun. Mae hyn yn wir er y byddai'r elw o'r digwyddiad, pe byddai wedi cael ei gynnal gan yr elusen ei hun, cymwys wedi'i eithrio rhag talu treth. Gall gwerthiannau a wnaed gan is-gwmni masnachu mewn digwyddiadau codi arian hefyd gael eu heithrio rhag talu TAW, ond nid yw'r is-gwmni masnachu yn mwynhau unrhyw driniaeth arbennig o ran treth gorfforaeth (gweler Ch3).

### **Gwybodaeth bellach**

Gweler canllaw y *Comisiwn Elusennau a Chodi Arian* (CC20), a pharagraff 36 o ganllaw ar-lein HMRC Masnachu a gweithgareddau busnes.

## C14. Beth sy'n digwydd os yw elusen yn colli arian o fasnachu heb fod yn brif ddiben?

### Yr ateb byr

Os yw elusen yn wynebu colledion o fasnachu heb fod yn brif ddiben, gall eithriadau treth yr elusen ar incwm arall fod mewn perygl, a gall yr ymddiriedolwyr fod yn atebol am dor-ymddiriedaeth.

### Yn fwy manwl

Os yw elusen yn wynebu colled o'i masnachu heb fod yn brif ddiben, ystyrir y golled mewn perthynas â'r masnachu yn 'wariant anelusenol', o fewn ystyr adran 506(1) Deddf 1988. Gallai hyn olygu cyfyngu ar eithriadau treth yr elusen ar incwm a/neu enillion eraill.

Barn y Comisiwn yw y byddai cael colled o'r fath yn cael ei ystyried yn dor-ymddiriedaeth dim ond os yw'r golled wedi codi drwy weithred anghyfrifol. Ym marn y Comisiwn, ni fyddai unrhyw dor-ymddiriedaeth, os:

- oedd yn rhesymol ddisgwyl y byddai'r fasnach yn llwyddiannus;
- oedd yn rhesymol i'r elusen ymgymryd â'r fasnach ei hun, yn hytrach na defnyddio is-gwmni masnachu;
- oedd y gwariant y deilliodd y golled ohono wedi'i gynnwys o fewn y pwerau sydd ar gael i'r ymddiriedolwyr.

Fodd bynnag, mae eithriad treth mewn perygl os yw'r golled yn codi drwy weithred anghyfrifol neu beidio. Wrth benderfynu a ddylai is-gwmni masnachu ymgymryd â'r fasnach neu beidio, dylai ymddiriedolwyr ystyried y ffaith os yw'r elusen ei hun yn ymgymryd â'r fasnach, gallai colled masnachu gyfyngu ar eithriadau treth yr elusen. Mewn rhai achosion, ond nid pob achos, gellid gosod cyfyngu'r eithriadau hyn yn erbyn y rhyddhad colled sydd ar gael. Mae paragraffau 52 i 55 canllaw ar-lein HMRC Elusennau Masnachu a gweithgareddau busnes yn rhoi manylion llawn.

### Gwybodaeth bellach

Gweler *Rhan Ch* i gael mwy o wybodaeth am is-gwmnïau masnachu.

# Ch. Elusennau gydag is-gwmniau masnachu

## Ch1. Beth yw 'is-gwmni masnachu', a phryd mae'n rhaid defnyddio is-gwmni masnachu?



### Yr ateb byr

Mae 'is-gwmni masnachu' yn gwmni y mae un neu ragor o elusennau yn berchen arno a'i reoli, ac fe'i sefydlwyd i fasnachu. Pwrpas is-gwmni masnachu fel arfer yw cynhyrchu incwm i'w riant elusen. Rhaid defnyddio is-gwmniau masnachu ar gyfer masnachau heb fod yn brif ddiben sy'n cynnwys risg sylweddol.

### Yn fwy manwl

Rhaid defnyddio is-gwmni masnachu mewn unrhyw achos lle y byddai risg sylweddol i asedau'r elusen, pe byddai'n ymgymryd â masnachu heb fod yn brif ddiben ei hun (gweler C8). Rhaid i'r is-gwmni masnachu gael ei sefydlu mewn ffordd sy'n diogelu'r rhiant elusen, a'i hasedau rhag y risgiau sy'n gysylltiedig â'r masnachu. Mae'r angen i ddiogelu asedau'r elusen rhag unrhyw risg sylweddol sy'n gysylltiedig â masnachu heb fod yn brif ddiben o'r pwys mwyaf. Nid yw'r ffaith y byddai elw masnachu wedi'i eithrio rhag talu treth pe bai'r elusen ei hun wedi ymgymryd â'r masnachu yn golygu o reidrwydd ei fod yn briodol i'r elusen ymgymryd â'r masnachu.

Nid yw'r elw o fasnach y mae is-gwmni masnachu yn ymgymryd â hi yn gymwys ar gyfer eithriad treth elusen. Maent yn atebol i dalu treth gorfforaeth yn y ffordd arferol. Ond gall taliadau a wnaed gan yr is-gwmni

masnachu i'r elusen neu'r elusennau sy'n berchen arno leihau lefel yr elw sy'n drethadwy yn yr is-gwmni masnachu. Ac mae eithriad treth ar gael i'r elusen sy'n derbyn ar gyfer yr incwm y mae'n ei dderbyn gan yr is-gwmni masnachu.

Mae hyn yn esbonio pam y gall fod yn fuddiol i elusen ddefnyddio is-gwmni masnachu hyd yn oed os nad oes unrhyw rwystr cyfreithiol i'r elusen fasnachu ei hun. Pe byddai'r elw o fasnachu gan elusen yn agored i dreth gorfforaeth (neu dreth incwm yn achos ymddiriedolaethau elusennol), gall defnyddio is-gwmni masnachu i fasnachu olygu bod modd i'r atebolrwydd i dalu treth ar yr elw masnachu gael ei leihau, neu ei ddileu.

Mae elusen sy'n darparu gwasanaethau hysbysebu a hyrwyddo eraill yn gyfnewid am nawdd busnes yn enghraifft o fasnachu sy'n annhebygol o beri unrhyw risg sylweddol i asedau'r

elusen, oherwydd mae'r treuliau a wyneba'r elusen yn ystod masnachu o'r fath yn debygol o fod yn fach. Felly, er nad oes unrhyw orchymyn yn y gyfraith elusennau i neilltuo'r math hwn o fasnachu i is-gwmni masnachol, gall fod mantais treth drwy wneud hynny, pe na fyddai'r elw yn gymwys ar gyfer unrhyw eithriad elusen. Byddai'r elusen yn atebol i dalu treth ar yr elw masnachu pe byddai'n ymgymryd â'r fasnach ei hun, ond pe byddai is-gwmni masnachu yn ymgymryd â'r masnachu, gellid trosglwyddo elw'r is-gwmni masnachu i'r elusen fel Rhodd Cymorth, gan felly cyfyngu ar unrhyw atebolrwydd i dalu treth, neu ei ddileu.

Os yw masnachu prif ddiben yn cael ei gynnal drwy is-gwmni masnachu, nid yw llawer o'r canllawiau yn yr Adran hon yn berthnasol: byddai cyllido'r is-gwmni masnachu yn ddefnydd elusennol o gronfeydd, yn hytrach na buddsoddi cronfeydd er mwyn gwneud elw.

Dylai is-gwmni masnachu fod yn ddichonol yn ariannol cyn gynted â phosibl. Felly, mae'n bwysig cael cynllun busnes sy'n nodi'n glir pryd y disgwylir i fasnachu fod yn broffidiol ac asesu cynnydd yn erbyn y cynllun busnes. Os na ragwelir dichonolrwydd ariannol o fewn dwy flynedd o weithredu, dylid ystyried priodoldeb ymgymryd â'r gweithgarwch masnachu arfaethedig yn ofalus.

## Ch2. Beth yw manteision defnyddio is-gwmni masnachu?

### Yr ateb byr

Prif fanteision defnyddio is-gwmni masnachu yw diogelu asedau'r rhiant elusen rhag risgiau masnachu; creu uned weinyddu ar wahân; a lleihau atebolrwydd i dalu treth. Fodd bynnag, yn yr achosion hynny lle nad yw defnyddio is-gwmni masnachu yn hanfodol, rhaid i ymddiriedolwyr gofio y gall fod anfanteision i ddefnyddio is-gwmni masnachu, ac wrth gwrs rhaid cydbwysu'r anfanteision hynny yn erbyn y manteision.

### Yn fwy manwl

Rhaid defnyddio is-gwmni masnachu mewn unrhyw achos lle y byddai risg sylweddol i asedau'r elusen pe byddai'n ymgymryd â gweithgarwch masnachu ei hun. Fodd bynnag, gall ymddiriedolwyr ddefnyddio is-gwmni masnachu am resymau eraill, er enghraifft:

- diogelu asedau'r elusen rhag risgiau masnachu, hyd yn oed os nad yw'r risgiau yn sylweddol;
- diogelu asedau'r elusen rhag risgiau masnachu, hyd yn oed os yw'r masnachu yn brif ddiben neu'n ategol;
- creu uned weinyddu ar wahân at ddibenion cyfrifyddu a/neu reoli er mwyn, er enghraifft, hwyluso llunio contractau ar gyfer darparu gwasanaeth cyhoeddus a diogelu asedau'r elusen yr un pryd; neu
- leihau neu ddileu'r atebolrwydd i dalu treth sy'n codi o'r gweithgareddau masnachu.

Fodd bynnag, gall fod anfanteision i drosglwyddo gweithgareddau masnachu elusen i is-gwmni masnachu. Er enghraifft:

- os mai treth yw'r prif reswm dros ddefnyddio is-gwmni masnachu, gall y manteision treth fod yn annigonol i gyfiawnhau'r costau ychwanegol sy'n gysylltiedig â sefydlu a gweithredu is-gwmni masnachu; a
- gall fod anfanteision i ddefnyddio is-gwmni masnachu oherwydd mae'n bosib na fydd rhai manteision y mae elusennau'n eu mwynhau ar gael, ee rhyddhad treth elusennau gweler Ch14) ac eithriad rhag talu treth tir toll stamp (gweler Ch21).

### Gwybodaeth bellach

Gweler hefyd canllaw y *Comisiwn Elusennau a Darparu Gwasanaeth Cyhoeddus: Cyflwyniad a throsolwg* (CC37).

## Ch3. Ydy is-gwmniau masnachu yn talu treth fel cwmniau eraill?



### Yr ateb byr

Ydynt. Mae rhai gwahaniaethau cyfreithiol rhwng is-gwmniau masnachu elusennau a chwmniau eraill. Fodd bynnag, mae modd i is-gwmni masnachu dalu peth neu'r cyfan o'i elw masnachu i'w riant elusen, gan felly eithrio'r elw hwnnw wrth gyfrifo atebolrwydd y cwmni masnachu at ddibenion treth gorfforaeth, a lleihau lefel yr atebolrwydd hwnnw.

### Yn fwy manwl

Mae is-gwmni masnachu yn agored i dalu treth gorfforaeth ar ei elw ei hun, yn yr un modd ag unrhyw gwmni arall. Ond gall yr is-gwmni masnachu wneud taliadau i'w riant elusen fel Rhodd Cymorth, a gall hyn leihau neu ddileu atebolrwydd treth gorfforaeth yr is-gwmni. Gweler Ch4.

Mae masnachu yn weithgarwch busnes, a rhaid i is-gwmni masnachu (neu yn wir elusen) sy'n ymgymryd â masnach gael ei gofrestru ar gyfer TAW os yw'r trosiant trethadwy yn fwy na'r terfyn statudol. Gall is-gwmniau masnachu fwynhau rhai o fanteision TAW y riant elusen (gweler Ch13).

### Gwybodaeth bellach

Cewch gyngor cyffredinol ar ddefnyddio is-gwmniau masnachu ar wefan HMRC yn y canllaw Masnachu a gweithgareddau busnes o fewn yr adran 'Elusennau'.

Cewch wybodaeth am y trothwy TAW yn y rhifyn cyfredol o Rybudd TAW 700/1. Mae rhybuddion TAW 701/1 (Elusennau) a 701/5 (Clybiau a Chymdeithasau) yn rhoi gwybodaeth bellach. Mae'r rhain hefyd ar gael yn yr adran 'Elusennau' ar wefan HMRC.

## Ch4. Sut gall is-gwmni masnachu dalu cronfeydd i'w riant elusen?

### Yr ateb byr

Gall cronfeydd gael eu talu ar ffurf dididend cyfrannau, llog ar gyfalaf benthyciadau ac ad-daliadau cyfalaf benthyciadau, neu fel Rhodd Cymorth. Mae llawer o fanteision treth i wneud y taliadau mewn ffordd sy'n cael yr effaith o leihau lefel yr atebolrwydd treth gorfforaeth yn yr is-gwmni masnachu.

### Yn fwy manwl

Mae Rhodd Cymorth yn ddull cyffredin i is-gwmni masnachu dalu cronfeydd i'w riant elusen. Y rheswm am hyn yw:

- mae taliadau Rhodd Cymorth yn lleihau incwm trethadwy yr is-gwmni masnachu gan swm y taliad. Felly, mae'n bosibl yn aml, drwy wneud taliadau o'r fath, i ddileu atebolrwydd posibl cyfan yr is-gwmni masnachu i dalu treth gorfforaeth (gweler hefyd Ch5).
- mae taliadau Rhodd Cymorth i'r rhiant elusen o is-gwmni masnachu wedi'u heithrio o dreth gorfforaeth (neu dreth incwm yn achos ymddiriedolaethau elusennol) os cânt eu defnyddio at ddibenion elusennol yn unig.

Gall is-gwmni masnachu wneud taliadau Rhodd Cymorth i'w riant elusen unrhyw bryd o ddechrau'r

cyfnod cyfrifyddu perthnasol tan naw mis o ddiwedd y cyfnod hwnnw. Gall gohirio taliadau gynorthwyo llif arian yn yr is-gwmni masnachu.

Mae amseriad y taliadau Rhodd Cymorth yn fater i gyfarwyddwyr yr is-gwmni masnachu yn bennaf. Ni fyddai disgwyl i ymddiriedolwyr y rhiant elusen ymyrryd oni bai fod rheswm ganddynt dros gredu nad oedd cyfarwyddwyr yr is-gwmni yn rhoi ystyriaeth briodol i fuddiannau'r elusen wrth wneud y penderfyniadau perthnasol.

Prin iawn y bydd cronfeydd yn cael eu talu i'r rhiant elusen drwy gyfrwng dididend cyfrannau, os o gwbl. Mae dididendau, fel taliadau Rhodd Cymorth, wedi'u heithrio o dreth yn nwylo'r rhiant elusen, ond nid ydynt yn lleihau elw trethadwy'r is-gwmni masnachu.

Felly, byddai'r dull hwn o dalu cronfeydd i'r rhiant elusen yn gadael atebolrwydd i dalu treth gorfforaeth yn yr is-gwmni masnachu.

Pan fydd rhiant elusen yn darparu cyfalaf benthyciadau i is-gwmni masnachu, wrth gwrs, rhaid i'r is-gwmni masnachu, wneud taliadau llog ac ad-daliadau o'r prifswm yn unol

â thelerau'r cytundeb benthyciad gyda'r elusen. Am fwy o wybodaeth gweler Ch10 ac Ch11. Gellir gwneud iawn am gostau cynnal benthyciad yn effeithiol wrth gyfrifo beth yw incwm trethadwy yr is-gwmni masnachu, naill ai'n uniongyrchol fel costau'r fasnach, neu drwy lwfansau cyfalaf.

## Ch5. All is-gwmni masnachu dalu mwy i'w riant elusen mewn Rhodd Cymorth na lefel yr elw masnachu (yn nhermau cyfrifyddu) y mae wedi'i ennill?

### Yr ateb byr

Gall. Yn gyffredinol bydd y mater hwn yn codi pan fydd lefel elw masnachu'r is-gwmni masnachu at ddibenion treth yn fwy na lefel ei elw at ddibenion cyfrifyddu. Bydd unrhyw atebolrwydd treth yn dibynnu ar lefel yr elw trethadwy. Os ydych am ddileu'r atebolrwydd hwnnw yn gyfan gwbl, bydd rhaid talu'r cyfan o'r elw trethadwy i'r elusen, er ei fod yn fwy na'r elw at ddibenion cyfrifyddu. Yn y rhan fwyaf o achosion, bydd angen cyllido'r gweddill o gyfalaf cyfrannau oherwydd fel arall mae'r is-gwmni masnachu yn debygol o fod yn ansolfent.

### Yn fwy manwl

Os yw is-gwmni masnachu yn ennill, mewn cyfnod cyfrifyddu, elw trethadwy sy'n fwy na'i elw at ddibenion cyfrifyddu, gall dalu i'w riant elusen swm sy'n fwy mewn Rhodd Cymorth nag sydd ganddo elw at ddibenion cyfrifyddu, er mwyn dileu ei atebolrwydd i dalu treth gorfforaeth. O ganlyniad, gall y cyfan neu ran o'r taliad Rhodd Cymorth gael ei wneud o gyfalaf cyfrannau tanysgrifedig y cwmni, gan gynnwys unrhyw gyfrif premiwm cyfrannau.

Er bod gwahaniaeth barn gyfreithiol ar y mater hwn, ystyrir y gall taliadau Rhodd Cymorth o'r fath gael eu gwneud o gyfalaf cyfrannau tanysgrifedig yr is-gwmni masnachu, ar yr amod bod gwrthrychau'r is-gwmni

masnachu yn awdurdodi rhoddion o'r fath. Gall y riant elusen, drwy danysgrifio cyfalaf cyfrannau ychwanegol yn yr is-gwmni masnachu, alluogi'r is-gwmni i wneud hyn heb wneud yr is-gwmni yn ansolfent.

Mae'n bosibl y gall fod yn well gan yr is-gwmni masnachu gaffael yr adnoddau y mae eu hangen i wneud y taliad Rhodd Cymorth llawn o gronfeydd a fenthycwyd gan y riant elusen. Fodd bynnag, mae HMRC Elusennau yn feirniadol o unrhyw drefniadau cylchol eu golwg. Dylai riant elusennau a'u his-gwmniau masnachu sy'n ystyried gweithredu fel hyn geisio cyngor proffesiynol, ac ystyried priodoldeb buddsoddi a'r materion ansolfedd a drafodir yn Ch8.

## Ch6. Sut dylai is-gwmnïau masnachu gael eu cyllido?



### Yr ateb byr

Fel arfer bydd is-gwmnïau masnachu yn cael eu cyllido gan eu rhiant elusennau, er bod modd cael cyllid allanol hefyd. Gall y cyllid gael ei ddarparu fel cyfalaf cyfrannau a/neu gyfalaf benthyciadau. Hefyd gall is-gwmnïau masnachu gadw elw, yn amodol ar ystyriaethau treth.

### Yn fwy manwl

Pan fydd is-gwmni masnachu yn cael ei ffurfio, gall ei riant elusen wneud cyfraniad nominal o gyfalaf cyfrannau yn yr is-gwmni masnachu er mwyn cydymffurfio â gofynion y gyfraith cwmnïau mewn perthynas â ffurfio cwmnïau. Fodd bynnag, fel arfer bydd yr is-gwmni masnachu yn gofyn am fwy na swm nominal o gyfalaf er mwyn gweithredu'n effeithiol.

Mae'r rhan fwyaf o gwmnïau yn cyllido eu busnes drwy gymysgedd o gyfalaf cyfrannau, cyfalaf benthyciadau, a chadw elw. Fodd bynnag mae'r system dreth yn annog is-gwmni masnachu i drosglwyddo ei elw i'r rhiant elusen fel Rhodd Cymorth. O ganlyniad mae cymhelliad gan is-gwmni masnachu i beidio ag ateb ei anghenion cyllido o elw a gedwir (gweler Ch7).

Felly, bydd angen is-gwmni masnachu am gyllid, yn y rhan fwyaf o achosion, yn cael ei ateb o gyfalaf cyfrannau a/

neu gyfalaf benthyciadau. Fel rheol, ond nid bob amser, darperir y cyfalaf hwn gan y rhiant elusen.

Rhaid gallu cyfiawnhau'r ddarpariaeth hon fel buddsoddiad o asedau'r elusen (gweler Ch8). Ni all rhiant elusennau ddarparu cymorth i is-gwmnïau masnachu ar delerau sy'n cynnwys elfen mwy neu elfen lai o rodd. Er enghraifft:

- ni all rhiant elusen wneud cyfraniadau i'r is-gwmni masnachu, mewn arian parod neu nwyddau, drwy brynu stoc ar gyfer yr is-gwmni, a rhoi'r stoc hwnnw i'r is-gwmni masnachu, neu fel arall;
- rhaid i riant elusen beidio â dalu dyledion is-gwmni masnachu; a
- rhaid i elusen, os yw'n caniatáu i is-gwmni masnachu ddefnyddio ei staff, adeiladau neu offer, godi taliadau teg ar y defnyddwyr hynny (gweler Ch21 ac Ch22).

## Ch7. All is-gwmni masnachu gyllido ei hun drwy gadw elw?

### Yr ateb byr

Gall, mae hyn yn bosibl. Fodd bynnag, bydd elw masnachu a gedwir yn agored i dalu treth gorfforaeth.

---

### Yn fwy manwl

Fel y nodwyd yn Ch4, os yw holl elw trethadwy yr is-gwmni masnachu yn cael ei dalu i'r rhiant elusen fel Rhodd Cymorth, mae atebolrwydd yr is-gwmni masnachu i dalu treth gorfforaeth wedi'i ddileu. Ond rhaid i anghenion yr is-gwmni masnachu am gyllid gael eu hateb o'r cyfalaf yn gyfan gwbl.

Mae'n well gan rai rhiant elusennau dderbyn y canlyniadau treth gorfforaeth a ddaw os yw'r is-gwmni masnachu yn cadw elw trethadwy. Yn wir, gall fod angen ei gadw os yw cyllid drwy gyfrwng benthyciad wedi'i geisio gan fanciau masnachol neu drydydd partiön eraill, er mwyn cynnal y benthyciad. Mae'r dull hwn o weithredu:

- yn cynnig modd i'r is-gwmni masnachu gyllido ei hun drwy gyfuniad o gyfalaf ac elw a gedwir mewn ffordd sy'n agosach at arferion masnachol cyffredin; a

- gall ei wneud yn haws hefyd i'r rhiant elusen gyfiawnhau buddsoddiadau yn yr is-gwmni masnachu, yn enwedig os yw cyllid ecwiti sylweddol yn ofynnol i gyllido gweithgareddau masnachu parhaus. Fodd bynnag, os yw is-gwmni masnachu yn cadw elw fel hyn, gall effeithio ar y rhyddhad TAW a fyddai ar gael fel arall (gweler Ch13).

### Gwybodaeth bellach

Dylid ceisio cyngor proffesiynol mewn unrhyw achos os yw ymddiriedolwyr yn ansicr ynghylch lefel y taliad Rhodd Cymorth i'r rhiant elusen sydd, at ei gilydd, yn fwyaf buddiol i'r elusen.

## Ch8. Pa rwymedigaethau cyfreithiol sy'n codi os yw ymddiriedolwyr yn buddsoddi cronfeydd elusen mewn is-gwmni masnachu?



### Yr ateb byr

Rhaid i ymddiriedolwyr y rhiant elusen allu cyfiawnhau cymorth ariannol ar gyfer is-gwmni masnachu fel buddsoddiad priodol o adnoddau'r elusen. Ym mhob achos rhaid i fuddiannau'r elusen fod o'r pwys mwyaf. Dylai unrhyw fuddsoddiad ddilyn polisi buddsoddi cyffredinol yr elusen.

### Yn fwy manwl

Mae'r ystyriaethau sy'n gymwys i fuddsoddiad gan riant elusen mewn is-gwmni masnachu, yn debyg i unrhyw fuddsoddiad arall o adnoddau'r elusen. Rhaid i ymddiriedolwyr, pan fyddant yn buddsoddi adnoddau elusen:

- fod yn sicr bod y buddsoddiad wedi'i gynnwys o fewn pŵerau buddsoddi'r elusen;
- dangos gofal a medr yn y broses fuddsoddi sy'n rhesymol yn yr amgylchiadau;
- ystyried yr addasrwydd i'r elusen o fuddsoddiadau sydd yr un fath â'r buddsoddiad arbennig y mae'n cynnig ei wneud;
- ystyried addasrwydd y buddsoddiad arbennig dan sylw, fel buddsoddiad o'r fath y mae'n ymddangos ei fod yn briodol i'w wneud;
- ystyried yr angen i arallgyfeirio buddsoddiadau, fel y bo'n briodol i amgylchiadau'r elusen; a
- cheisio ac ystyried cyngor am y buddsoddiad gan unigolyn y mae'n rhesymol i'r ymddiriedolwyr gredu ei fod yn gymwys i'w roi drwy ei allu a phrofiad ymarferol o faterion ariannol a materion eraill; rhaid i'r cyngor ystyried addasrwydd a'r pwyntiau arallgyfeirio y sonnir amdanynt uchod.

Yng nghyd-destun buddsoddiad arfaethedig mewn is-gwmni masnachu a ddefnyddir i ymgymryd â masnachu heb fod yn brif ddiben, mae'n golygu bod:

- rhaid i'r ymddiriedolwyr ystyried yn rhesymol ei fod er lles yr elusen i wneud y buddsoddiad, ar ôl gwneud cymhariaeth deg rhwng y math hwn o fuddsoddiad a mathau eraill o fuddsoddiad y gellid eu dewis;

- rhaid i'r gymhariaeth deg hon gynnwys asesiad gwrthrychol o ragolygon busnes yr is-gwmni masnachu;
- rhaid i'r ymddiriedolwyr fodloni eu hunain ynghylch dichonoldeb ariannol yr is-gwmni masnachu, yn seiliedig ar ei gynllun busnes, rhagolygon llif arian, rhagamcaniadau elw, dadansoddiad risg a gwybodaeth arall sydd ar gael; a
- rhaid i'r ymddiriedolwyr geisio cyngor priodol ar y buddsoddiad, a dichonolrwydd ariannol yr is-gwmni masnachu. Bydd yr hyn sy'n 'briodol' yn dibynnu ar yr amgylchiadau: mae'r gost o geisio cyngor yn ffactor perthnasol, a dylai'r gost gyfateb â maint y buddsoddiad arfaethedig.

Dylai ymddiriedolwyr:

- roi sylw i'r cyfnod y gallai'r cronfeydd gael eu rhwymo mewn buddsoddiad mewn is-gwmni masnachu, oherwydd mae'n bosib na fydd yn hawdd realeiddio cronfeydd y mae eu hangen yn y tymor byr i ganolig pan gânt eu buddsoddi yn y ffordd hon;
- ystyried, a cheisio cyngor addas, ar y posibilrwydd o gael cyllid annibynnol fel dewis arall i gyllido gan yr elusen. Gweler Ch9.

Mae union strwythur y buddsoddiad yn yr is-gwmni masnachu yn benderfyniad y mae ymddiriedolwyr y rhiant elusen (gyda chyngor proffesiynol) yn gyfrifol amdano, gan ystyried dyletswyddau buddsoddi ymddiriedolwyr sydd wedi'u crynhoi uchod. Hefyd, rhaid i ymddiriedolwyr ystyried yn achlysurol a ddylid cadw neu waredu buddsoddiad sy'n bod. Wrth adolygu buddsoddiadau, mae'r dyletswyddau yn debyg i'r rhai a nodir uchod.

Rhaid i ymddiriedolwyr ystyried adran 506(4), ac atodlen 20 Deddf 1988 hefyd. Gall y darpariaethau hyn greu effaith treth os yw benthyciadau i is-gwmnïau masnachu, neu fuddsoddiadau ecwiti mewn is-gwmnïau masnachu yn amhriodol. Mae'r pwnc hwn wedi'i grynhoi yn Ch12.

### **Gwybodaeth bellach**

Cewch fwy o wybodaeth am ddyletswyddau ymddiriedolwyr o ran buddsoddi yn y canllaw manwl ar elusennau a buddsoddi a gyhoeddir yn yr adran 'Arweiniad i Elusennau' .

## Ch9. All elusen geisio buddsoddiad allanol mewn is-gwmni masnachu?

### Yr ateb byr

Gall. Mae'n arfer da i ymddiriedolwyr rhiant elusen ystyried a yw'n ddymunol cael eraill i fuddsoddi yn eu his-gwmni masnachu. Byddai hyn yn lledaenu risgiau'r fasnach, a gall gyfrannu'n bositif at hylifedd yr elusen. Ond gall fod yn anodd denu buddsoddiad o'r fath am gost resymol.

### Yn fwy manwl

Gall rhannu'r risg o fasnach yn methu gydag ariannwr annibynnol fod yn ddewis synhwyrol i riant elusen, ar yr amod nad yw'r gost yn ormodol. Mantais ychwanegol o gynnwys ariannwr annibynnol yw y bydd unigolyn o'r fath yn gallu darparu asesiad annibynnol o ddichonoldeb economaidd gweithrediad yr is-gwmni masnachu.

Rhaid ystyried yn ofalus natur a thelerau unrhyw fuddsoddiad allanol. Er mwyn cadw ei atebolrwydd i dalu treth gorfforaeth i'r lleiaf posibl, fel rheol bydd yr is-gwmni masnachu yn talu'r cyfan o'i elw trethadwy i'w riant gwmni fel Rhodd Cymorth (gweler Ch3). Drwy wneud hyn ni fyddai unrhyw gronfeydd yn weddill i'w dosbarthu i gyfranddalwyr fel difidendau.

Felly ni fydd buddsoddiad cyfalaf cyfrannau mewn is-gwmni masnachu elusen yn ddeniadol fel arfer i gyllidwyr allanol sy'n cael eu cymell gan elw. Ond gallai buddsoddiad cyfalaf cyfrannau mewn is-gwmni masnachu gael ei farchnata i gefnogwyr y rhiant elusen, a allai fod awyddus i gael adenillion masnachol.

Yn y rhan fwyaf o achosion, bydd buddsoddiad allanol mewn is-gwmni masnachu'r elusen ar ffurf cyfalaf benthyciadau, oherwydd bydd taliadau llog ar fenthyciadau ac ad-daliadau o'r prifswm yn digwydd cyn rhoi unrhyw daliadau Rhodd Cymorth i'r rhiant elusen. Gall cyllid benthyciad fod ar gael gan fanciau, a benthycwyr preifat eraill, gan gynnwys cefnogwyr yr elusen.

Dylai ymddiriedolwyr roi sylw arbennig i delerau'r cyfalaf benthyciadau oherwydd gallai taliadau llog leihau lefel yr elw masnachu yn yr is-gwmni yn fawr. Hyd yn oed os yw gweithrediad yr is-gwmni masnachu yn broffidiol cyn taliadau benthyciad, mae'n bosibl na fydd felly wedi hynny. Dylai elusennau ystyried y posibilrwydd o gael cyfalaf benthyciadau gan eu cefnogwyr, a all fod yn barod i ddarparu cyllid ar delerau ffafriol.

Wrth lunio menter ar y cyd o'r natur hon, mae'n bwysig bod y buddsoddiad er lles yr elusen. Fel agwedd ar ystyried priodoldeb y fenter ar y cyd, dylai'r ymddiriedolwyr ystyried a ddylid gwneud unrhyw wiriadau diwydrwydd dyladwy ar statws ariannol y partner(iaid) eraill, a dylent sicrhau eu bod nhw â'u partner(iaid) menter ar y cyd â barn debyg ynghylch graddfa'r buddsoddiad sydd ei hangen, lefel y risg masnachu a dderbynnir, y mecanwaith ar gyfer pennu cyfeiriad y gweithgarwch masnachu ac am ddatrys unrhyw anghytuno rhwng y partneriaid.

Wrth lunio menter ar y cyd, er y bydd pob parti yn rhagweld canlyniad llwyddiannus, mae hefyd yn bwysig ystyried y 'strategaeth ymadael', rhag ofn y bydd anawsterau anorchfygol yn codi.

Un o brif achosion menter ar y cyd yn methu yw gwahaniaeth anghymodlon yn nealltwriaeth partneriaid am gyfeiriad y fenter ar y cyd. O ganlyniad, argymhellir y dylai pob partner ystyried a chytuno ar amcanion y fenter ar y cyd, sicrhau bod yr holl ddogfennaeth angenrheidiol wedi'i chwblhau, a bod cynllun busnes wedi cael ei gytuno. Argymhellir bod ymddiriedolwyr yn ceisio cyngor proffesiynol pellach, lle bo'n briodol.

Rhaid i ymddiriedolwyr sy'n ystyried menter ar y cyd o'r natur hon gofio'r ddau bwynt treth canlynol:

1. Oni bai fod y cwmni menter ar y cyd ym mherchnogaeth lwyr un neu ragor o elusennau, rhaid i unrhyw daliadau sy'n cael eu rhoi i elusen fel Rhodd Cymorth gael ei wneud yn ystod y flwyddyn ariannol y bydd y taliadau yn cael eu gosod yn erbyn elw trethadwy'r cwmni. Mae'r gallu i wneud taliadau Rhodd Cymorth hyd at 9 mis ar ôl diwedd y flwyddyn ariannol berthnasol (gweler Ch4) ar gael i gwmniau sydd ym mherchnogaeth lwyr un elusen neu fwy yn unig;
2. Os yw'r partner masnachol yn derbyn cyfran o'r elw gan y cwmni, gall HMRC herio'r defnydd o Rodd Cymorth i wneud taliad cyfatebol i'r partner elusennol.

## Ch10. Pa ystyriaethau sy'n berthnasol i fuddsoddiad elusen o gyfalaf cyfrannau mewn is-gwmni masnachu?

### Yr ateb byr

Os yw'r busnes yn methu, mae cyfranddalwyr yn llai tebygol o adennill eu buddsoddiad na buddsoddwyr cyfalaf benthyciadau. Fodd bynnag, bydd buddsoddiad o gyfalaf cyfrannau gan y rhiant elusen yn rhoi hyder yn yr is-gwmni masnachu i gyflenwyr ac eraill y mae'n gwneud busnes â nhw.

### Yn fwy manwl

Nid yw cyfranddaliwr mewn is-gwmni masnachu yn gredydwr y cwmni fel y cyfryw. Fel rheol gall cyfalaf cyfrannau gael ei ad-dalu os yw'r cwmni yn diddymu, ac yna bydd cyfranddalwyr yn cael swm ar gyfer eu cyfalaf cyfrannau dim ond os yw holl gredydwyr y cwmni wedi cael eu had-dalu'n llawn. Fel cyfranddaliwr, nid oes gan y rhiant elusen hawl absoliwt i dderbyn difidendau neu roddion o'i his-gwmni masnachu.

Fel rheol, atyniad buddsoddiad cyfalaf cyfrannau (o'i gymharu â chyfalaf benthyciadau) yw ei fod yn rhoi (neu'n cynyddu) hawl i gyfranogi yn elw'r cwmni ar ffurf difidendau pan gânt eu datgan. Mae hyn yn cyfiawnhau'r risg mwy i fuddsoddwyr o'i gymharu â chyfalaf benthyciadau. Ond mae'n amlwg nad yw'r atynnid yn bodoli os yw'r is-gwmni masnachu eisoes ym mherchnogaeth lwyr y rhiant elusen.

Fodd bynnag, mae rhesymau dilys pam y gallai rhiant elusen ddewis gyfalafu is-gwmni masnachu drwy gyfrwng cyfalaf cyfrannau yn hytrach na chyfalaf benthyciadau. Er enghraifft:

- gall cyfraniad rhiant elusen o gyfalaf cyfrannau sylweddol yn ei his-gwmni masnachu roi hyder i gyflenwyr, cwsmeriaid, credydwyr, darpar gredydwyr ac eraill y mae gan yr is-gwmni masnachu berthynas fusnes ag ef; neu
- pe byddai is-gwmni masnachu yn agored i risg neu ansolfedd pe byddai'n cael ei gyfalafu gan fenthyciad, ni fydd llawer o ddewis gan ymddiriedolwyr ond buddsoddi cyfalaf cyfrannau (yn amodol ar yr ystyriaethau a nodwyd yn Ch8).

Mae'r ffaith na fydd y cyfalaf cyfrannau a gyfrannwyd gan y rhiant elusen yn yr is-gwmni masnachu yn cael ei ad-dalu'n llawn, neu hyn yn oed yn rhannol efallai, pan gaiff yr is-gwmni ei ddiddymu, yn un o'r ffactorau y dylai cynghorydd buddsoddi'r elusen ei ystyried wrth benderfynu p'un ai i

argymhell i ymddiriedolwyr y rhiant elusen i gyfrannau cyfalaf cyfrannau. Byddai'n rhaid i'r cynghorydd ystyried yr adenillion economaidd cyfan i'r elusen, gan gydbwyso taliadau Rhodd Cymorth ac unrhyw ddosraniadau a ragwelir yn erbyn y risg o golli cyfalaf.

## Ch11. Pa ystyriaethau sy'n berthnasol i fuddsoddiad elusen o gyfalaf benthyciadau mewn is-gwmni masnachu?



### Yr ateb byr

Fel darparwr cyfalaf benthyciadau i'r is-gwmni masnachu, mae hawl cytundebol gan riant elusen i ad-dalu'r prifswm. Mae hyn yn rhoi mwy o sicrwydd ad-daliad i'r rhiant elusen, ond gall hefyd greu ansolfedd i'r cwmni pe na fyddai'n gallu gwasanaethu ei fenthyciadau.

### Yn fwy manwl

Mae hawl gytundebol gan fenthyciwr i dalu llog ar y benthyciad, ac ad-dalu'r prifswm ar ddiwedd cyfnod y benthyciad. Felly, mae darparu cyfalaf benthyciadau yn rhoi mwy o sicrwydd i'r elusen sy'n buddsoddi na darparu cyfalaf cyfrannau, sydd heb gynnig unrhyw warantau o'r fath.

Fodd bynnag, mae swm unrhyw gyfalaf benthyciadau a ddelir gan gwmni yn cael ei ystyried wrth bennu ei solfedd. Ni all cwmni fasnachu os yw'n ansolfent. Felly, ni ddylai ymddiriedolwyr fuddsoddi cyfalaf benthyciadau mewn is-gwmni masnachu os yw'n rhesymol i ragweld na fydd yr is-gwmni yn gallu cynnal y benthyciad neu ei ad-dalu pan fydd y cyfnod yn dod i ben. Mewn achosion o'r fath dylai ymddiriedolwyr:

- ystyried a yw er lles yr elusen i gynnal y cwmni o gwbl, neu a yw er ei lles gorau i'w ddiwedd neu ei werthu fel busnes byw (yn seiliedig ar yr egwyddorion a nodwyd yn Ch8) (gweler hefyd Ch16).
- darparu'r buddsoddiad fel cyfalaf cyfrannau (gweler Ch10), os yw er lles yr elusen i ddarparu cyllid ychwanegol.

Gall darparu cyfalaf benthyciadau greu ansolfedd yn anfwriadol mewn is-gwmni masnachu hyd yn oed os yw'n masnachu'n broffidiol. Er mwyn dileu atebolrwydd i dalu treth gorfforaeth, bydd is-gwmni masnachu yn aml yn talu i'w riant elusen fel Rhodd Cymorth ei holl elw a fyddai fel arall yn agored i dalu treth gorfforaeth (gweler Ch4). O ganlyniad gall yr is-gwmni masnachu gadw adnoddau annigonol i ad-dalu benthyciadau a

wnaed gan yr elusen pryd a phan y byddant yn ddyledus. Byddai hynny'n golygu bod yr is-gwmni masnachu yn ansolfent, oherwydd ni fyddai'n gallu talu ei ddyledion.

Os yw elusen yn rhoi benthyciadau i is-gwmni masnachu, rhaid i ymddiriedolwyr benderfynu ar y telerau o ran y gyfradd llog ac ad-dalu'r prifswm. Rhaid iddynt hefyd benderfynu sut y dylid gwarantu'r benthyciad. Mae'r penderfyniadau hyn yn rhan o ddyletswyddau'r ymddiriedolwyr a nodwyd yn Ch8.

Efallai yr hoffai ymddiriedolwyr roi benthyciad di-log i is-gwmni masnachu, neu fenthyciad a warentir dim ond drwy ymrwymiad cytundebol yr is-gwmni, ac nid drwy arwystl dros asedau'r is-gwmni. Fodd bynnag, mae

HMRC Elusennau yn feirniadol o fenthyciadau sydd heb eu gwneud ar delerau masnachol priodol (gweler Ch12). Yn arbennig:

- nid yw'n debygol y gellid cyfiawnhau benthyciadau di-log i is-gwmni masnachu fel buddsoddiad, oni bai fod swm y benthyciad yn fach; ac
- er bod creu arwystl dros eiddo'r is-gwmni masnachu i warantu benthyciad yn cynnwys cost, nid yw'n debygol y gellid cyfiawnhau benthyciad a warentir dim ond drwy ymrwymiad cytundebol yr is-gwmni masnachu fel buddsoddiad, oni bai fod swm y benthyciad yn fach, neu os yw gwerth y warant sydd ar gael yn yr is-gwmni yn gyfyngedig.

## Ch12. Pa oblygiadau treth eraill y mae angen eu hystyried wrth fuddsoddi mewn is-gwmni masnachu?

### Yr ateb byr

Mae'n bwysig sicrhau nad yw unrhyw fuddsoddiad gan riant elusen mewn is-gwmni masnachu yn cael ei drin fel 'gwariant anelusennol', yn ôl y diffiniad ohono yn adran 506 Deddf 1988. Os yw'n cael ei drin felly, gall atebolrwydd i dalu treth godi.

### Yn fwy manwl

Bydd unrhyw fuddsoddiad mewn is-gwmni masnachu, boed ar ffurf cyfalaf cyfrannau neu gyfalaf benthyciadau, yn cael ei drin fel 'gwariant anelusennol' o fewn ystyr adran 506 Deddf 1988 os nad yw'n fenthyciad neu'n fenthyciad cymwys yn ôl y diffiniad yn Atodlen 20 y Ddeddf honn. Os yw'n cael ei drin fel gwariant anelusennol, gall rhai o eithriadau treth yr elusen gael eu cyfyngu.

Er mwyn osgoi cael ei drin fel gwariant anelusennol, rhaid i'r ymddiriedolwyr allu bodloni HMRC Elusennau fod y buddsoddiad yn yr is-gwmni masnachu wedi'i wneud er budd y rhiant elusen yn unig, ac nid er mwyn osgoi treth, gan yr elusen neu unrhyw un arall.

Ni fyddai buddsoddiad yn cael ei ystyried 'er budd y rhiant elusen', er enghraifft, pe byddai'r buddsoddiad yn hapfasnachol, neu wedi'i gymell gan awydd i gadw'r is-gwmni masnachu, waeth beth fo'r rhagolygon o adenillion economaidd i'r rhiant elusen.

Gall benthyciad sy'n honni ei fod yn fuddsoddiad hefyd gael ei ystyried gan HMRC Elusennau yn "wariant anelusennol" os:

- yw'r cytundeb benthyciad heb gynnwys y ddarpariaeth briodol ar gyfer ei ad-dalu;
- yw'r benthyciad heb ei warantu ac mae asedau gan y cwmni y gellid fod wedi gwarantu'r benthyciad arno;
- mae'r cytundeb benthyciad yn darparu ar gyfer cyfradd adenillion nad yw'n adlewyrchu lefel y risg; neu
- rhagwelwyd o'r dechrau na fyddai'r cytundeb benthyciad yn cael ei weithio allan, ee byddai'r benthyciad yn cael ei ddileu gan y rhiant elusen.

Mae'n bwysig i ymddiriedolwyr gadw cofnod o'r trafodion sy'n rhagflaenu unrhyw benderfyniad i wneud buddsoddiad mewn is-gwmni masnachu, a'u bod yn gallu dangos i

HMRC Elusennau bod y dyletswyddau buddsoddi a ddisgrifir yn fras uchod wedi cael eu cyflawni'n briodol o ran gwneud y buddsoddiad hwnnw.

Gall y darpariaethau 'rhoddwr sylweddol' a ddeddfwyd yn Neddf Cyllid 2006 hefyd gael yr effaith o drin buddsoddiad elusen mewn busnes fel gwariant anelusennol, os yw'r busnes hwnnw wedi gwneud cyfraniadau

sylweddol i'r elusen. Fodd bynnag, ni all is-gwmni masnachu fod yn 'rhoddwr sylweddol' mewn perthynas â'i riant elusen ei hun, waeth beth fo maint y taliadau y mae'n eu gwneud, neu wedi'u gwneud, i'r riant elusen.

### **Gwybodaeth bellach**

Cyfeiriwch at wefan HMRC a'r canllaw Masnachu a gweithgareddau busnes.

## **Ch13. Ydy is-gwmni masnachu yn mwynhau manteision TAW a threth gorfforaeth a roddir i'w riant elusen?**

### **Yr ateb byr**

Mae is-gwmni masnachu yn mwynhau rhai, ond nid pob un o fanteision TAW ei riant elusen, ar yr amod bod rhai amodau'n cael eu bodloni. Nid oes unrhyw fanteision cyfatebol o ran treth gorfforaeth.

### **Yn fwy manwl**

Ar yr amod bod yr is-gwmni masnachu yn trosglwyddo'r elw masnachu sy'n deillio o'r gwerthiannau perthnasol i'r elusen o dan gytundeb ysgrifenedig neu rwymedigaeth gyfreithiol arall, gall manteision canlynol y riant elusen hefyd fod yn gymwys i is-gwmni masnachu:

- TAW cyfradd sero ar werthu neu osod nwyddau a roddwyd (gweler C3);
- eithriad TAW ar werthu nwyddau a gwasanaethau gan is-gwmni masnachu mewn cysylltiad â digwyddiadau codi arian (gweler C13).

Nid yw eithriadau treth gorfforaeth gyfatebol yn gymwys. Fodd bynnag, gall yr is-gwmni masnachu leihau ei atebolrwydd i dalu treth gorfforaeth drwy wneud taliadau i'r riant gwmni fel Rhodd Cymorth (gweler Ch1 i 4).

## Ch14. Ydy is-gwmnïau masnachu yn gymwys i gael rhyddhad ardrethu?

### Yr ateb byr

Nid oes gan is-gwmnïau masnachu hawl absoliwt i ryddhad ardrethu ar gyfer eiddo a feddiannir ganddynt. Ond gall yr awdurdod ardrethu roi rhyddhad treth yn ôl ei ddisgresiwn.

### Yn fwy manwl

Gall eiddo annomestig a feddiannir ac a ddefnyddir gan elusen hawlio rhyddhad cyfradd orfodol o 80%, a elwir yn 'rhyddhad cyfradd elusen'. Gall yr 20% sy'n weddill gael ei hepgor yn ôl disgresiwn yr awdurdod ardrethu lleol. Er mwyn bod yn gymwys am y rhyddhad hwn, rhaid i eiddo:

- gael ei feddiannu gan elusen, neu ymddiriedolwyr elusen; a
- chael ei ddefnyddio'n llwyr neu'n bennaf at ddibenion elusennol.

Yn y cyd-destun hwn, fel rheol nid yw'r term 'dibenion elusennol' yn cynnwys gweithgareddau codi arian, ond mae'n cynnwys gwerthu nwyddau a roddwyd.

Nid yw'r rhyddhad gorfodol hwn ar gael yn achos eiddo a feddiannir gan is-gwmni masnachu. Fodd bynnag, mae disgresiwn gan awdurdodau ardrethu i roi rhyddhad treth i rai cyrff nad ydynt yn elusennau.

Mae eiddo a feddiannir yn rhannol gan elusen ac a ddefnyddir at ddibenion elusennol, ac yn rhannol gan is-gwmni masnachu, yn gymwys i gael rhyddhad ardrethu elusen gorfodol dim ond ar gyfer y rhan a feddiannir gan yr elusen.

Gall rhyddhad cyfradd elusen fod ar gael os yw elusen yn meddiannu eiddo er bod yr eiddo yn cael ei ddefnyddio'n rhannol i godi arian, ar yr amod y caiff ei ddefnyddio'n 'bennaf' at 'ddibenion elusennol'. Er bod y fasnach codi arian yn mynd rhagddo gan is-gwmni masnachu, gall yr elusen ddadlau ei fod yn meddiannu'r eiddo cyfan, ac yn ei ddefnyddio'n 'bennaf' at ddibenion elusennol.

Er enghraifft, os yw nwyddau a roddwyd yn cael eu gwerthu yn yr un siop â nwyddau a brynwyd i mewn, gall yr elusen werthu'r nwyddau a roddwyd ei hun (gan gofio nad yw hyn

yn 'fasnachu' (gweler C3) a gall werthu'r nwyddau a brynwyd i mewn fel asiant i'r is-gwmni masnachu (gweler C10). Yna gall yr elusen hawlio rhyddhad ardrethu elusen ar gyfer y siop drwy fodloni'r awdurdod fod y siop wedi'i meddiannu gan yr elusen 'yn bennaf' at ddiben gwerthu'r nwyddau a roddwyd.

Nid oes diffiniad statudol o 'yn bennaf'. Fodd bynnag, dadleuir yn aml os yw gwerth gwerthiannau nwyddau a

roddwyd mewn cyfnod arbennig yn fwy na gwerth gwerthiannau nwyddau a brynwyd i mewn, bod yr eiddo yn cael ei ddefnyddio'n 'bennaf' ar gyfer gwerthu nwyddau a roddwyd, ac felly at ddibenion elusennol. Mewn achosion o'r fath dylai'r ymddiriedolwyr gysylltu â'r awdurdod ardrethu priodol ac, os oes angen, eu cynghorwyr cyfreithiol eu hunain am gyngor pellach.

## Ch15. All ymddiriedolwyr elusen a gweithwyr rhiant elusen fod yn gyfarwyddwyr is-gwmni masnachu hefyd?

### Yr ateb byr

Mae'n arferol i rai o ymddiriedolwyr a/neu weithwyr rhiant elusen fod yn gyfarwyddwyr is-gwmni masnachu hefyd. Fodd bynnag, bydd y cyfyngiadau arferol ar dalu ymddiriedolwyr elusen am unrhyw waith a wnânt ar gyfer yr elusen hefyd yn gymwys i unrhyw waith a wnânt i'r is-gwmni masnachu.

### Yn fwy manwl

Er mwyn sicrhau bod yr is-gwmni masnachu yn cael ei reoli er lles y rhiant elusen, a monitro ei berfformiad, bydd rhai o'r ymddiriedolwyr a/neu weithwyr yr elusen yn gweithredu fel cyfarwyddwyr yr is-gwmni masnachu yn aml. Fodd bynnag, rhaid iddynt gofio bod yr elusen a'r is-gwmni masnachu yn endidau gwahanol. Mae dau gyfrifoldeb gwahanol gan unrhyw un sy'n ymwneud â gweinyddu'r ddau, a gall fod yn anodd cydbwysu'r cyfrifoldebau sy'n gwrthdaro ar brydiau.

Nid oes modd talu ymddiriedolwr elusen am ei wasanaethau fel cyfarwyddwr neu weithiwr is-gwmni masnachu'r elusen oni bai:

- fod dogfen lywodraethol yr elusen yn darparu'n benodol ar gyfer hyn; neu
- mae rhyw awdurdod penodol arall, megis gorchymyn gan y Comisiwn Elusennau.

Ni all sefydlu is-gwmni masnachu, os yw cyfarwyddwyr yr is-gwmni hwnnw yr un bobl ag ymddiriedolwyr y rhiant elusen, gael ei ddefnyddio fel dull o dalu ymddiriedolwyr yr elusen 'trwy'r drws cefn'.

Fel mater o lywodraethu da, dylai fod:

- o leiaf un unigolyn sy'n ymddiriedolwr, ond heb fod yn gyfarwyddwr nac yn weithiwr yr is-gwmni masnach; ac
- o leiaf un unigolyn sy'n gyfarwyddwr yr is-gwmni masnachu, ond heb fod yn ymddiriedolwr neu'n weithiwr yr elusen.

Disgrifir y bobl hyn fel pobl 'heb unrhyw wrthdaro' oherwydd nid oes unrhyw wrthdaro buddiannau yn eu rolau. Dylai'r ymddiriedolwyr a chyfarwyddwyr heb wrthdaro gynghori eu cydweithwyr ynghylch y camau

priodol i'w cymryd os yw dyletswyddau'r rhai sydd â ddau gyfrifoldeb yn gwrthdaro. Mae hyn yn lleihau'r risg o unrhyw drafodiad rhwng y rhiant elusen a'r is-gwmni masnachu yn cael ei herio neu ei gwestiynu.

Os yw'r ymddiriedolwyr wedi dirprwyo cyfrifoldeb dros fonitro gweithrediad yr is-gwmni masnachu i bwyllgor wedi'i

ffurfio'n gyfan gwbl o bobl sy'n gyfarwyddwyr neu'n weithwyr yr is-gwmni, dylent sicrhau bod systemau mewn lle i sicrhau bod cyngor yn cael ei geisio gan ymddiriedolwr heb wrthdaro os yw'n briodol.

## Ch16. Beth ddylai ymddiriedolwyr ei wneud os yw'r is-gwmni masnachu mewn trafferthion ariannol?



### Yr ateb byr

Rhaid i ymddiriedolwyr roi buddiannau'r rhiant elusen yn gyntaf bob amser. Weithiau bydd hyn yn golygu diddymu, neu werthu, is-gwmni masnachu aflwyddiannus. Os yw ymddiriedolwyr yn cadw is-gwmni masnachu aflwyddiannus ar draul yr elusen, gallant fod yn atebol yn bersonol am golledion dilynol i'r elusen.

### Yn fwy manwl

Os yw'r is-gwmni masnachu wedi bod yn rhedeg ar golled am gyfnod sylweddol, heb unrhyw ffactorau tymor byr arbennig, rhaid i'r ymddiriedolwyr ystyried dichonolrwydd yr is-gwmni masnachu. Rhaid i ymddiriedolwyr gadw unrhyw golledion i'r elusen i'r lleiaf posibl, heb ystyried unrhyw deimlad o rwymedigaeth foesol a all fod gan yr ymddiriedolwyr tuag at yr is-gwmni masnachu, ei gyfarwyddwyr a'i weithwyr.

Os yw'r ymddiriedolwyr yn buddsoddi arian pellach i gefnogi is-gwmni masnachu sy'n colli arian ar adeg pan oedd yn glir bod methiant yr is-gwmni yn debygol, gallai hyn olygu tor-ymddiriedaeth ar eu rhan a'u rhoi mewn risg personol o wneud iawn am unrhyw golledion i'r elusen. Dylai ymddiriedolwyr sy'n wynebu'r amgylchiadau hyn geisio cyngor gan eu cyngorwyr proffesiynol.

Os yw'r is-gwmni masnachu yn diffyg dalu ar gytundeb benthyciad â'r elusen, rhaid i'r ymddiriedolwyr ystyried gorfodi hawliau'r elusen o dan y cytundeb. Wrth benderfynu ar yr union gamau i'w cymryd, rhaid i'r ymddiriedolwyr ddefnyddio eu barn fasnachol, yn seiliedig ar gyngor proffesiynol priodol. Rhaid i'w penderfyniad gael ei seilio ar les gorau'r elusen sy'n berchen ar yr is-gwmni masnachu.

Mae gan ymddiriedolwyr gyfrifoldebau tebyg os yw'r elusen wedi buddsoddi cyfalaf cyfrannau yn yr is-gwmni masnachu, er nad yw cyfalaf cyfrannau yn agored i'w ad-dalu. Yn y pendraw, ymateb y rhiant elusen - yn ei rôl fel cyfranddaliwr - i fethiant yr is-gwmni masnachu yw naill ai sicrhau bod yr is-gwmni yn cael ei ddwyn i ben neu werthu'r busnes fel busnes byw i drydydd parti.

Gallai ymddiriedolwyr ofni y byddai caniatáu i is-gwmni masnachu gael ei ddiddymu'n ansolfent yn cael effaith andwyol ar enw da'r elusen. Gallai hyn ymddangos fel petai'n cyfiawnhau gwneud buddsoddiad pellach, a/neu gadw buddsoddiadau sy'n bod yn yr is-gwmni, er mwyn atal neu leihau colledion i gredydwy'r yr is-gwmni.

Fodd bynnag, prif bwynt ymgymryd â masnach drwy is-gwmni masnachu yw diogelu asedau'r elusen rhag risgiau'r

fasnach (gweler Ch1). Defnyddio'r asedau hynny i ddiogelu credydwy'r yr is-gwmni yw'r union ganlyniad y mae cyfyngiadau'r gyfraith elusennau ar fasnachu gan elusen ei hun yn ceisio ei atal. Os yw ymddiriedolwyr yn gweithredu i gadw'r is-gwmni masnachu mewn busnes, waeth beth fo buddiannau'r elusen, gallant fod yn atebol yn bersonol am unrhyw golled ddilynol yng ngwerth buddsoddiad yr elusen yn yr is-gwmni masnachu.

## Ch17. Pa ddyletswyddau sydd gan ymddiriedolwyr elusen o ran is-gwmnïau masnachu?



### Yr ateb byr

Rhaid i ymddiriedolwyr fonitro perfformiad yr holl is-gwmnïau masnachu yn gyson, a buddsoddiadau'r rhiant elusen ynddynt, gyda'r nod o sicrhau defnydd da a phriodol o asedau'r elusen. Rhaid iddynt fod yn barod i ymarfer hawliau'r rhiant elusen fel cyfranddaliwr.

---

### Yn fwy manwl

Rhaid i ymddiriedolwyr adolygu'r berthynas rhwng y rhiant elusen a'r is-gwmni masnachu yn rheolaidd. Diben sefydlu is-gwmni masnachu fel rheol yw codi arian i'r elusen, a dylai ei effeithiolrwydd yn hyn o beth gael ei fonitro. Ni ddylai adolygiad o fuddsoddiadau aros am sbardun penodol, megis darganfod bod is-gwmni masnachu mewn trafferthion ariannol.

Rhaid i ymddiriedolwyr y rhiant elusen hefyd ymarfer hawliau'r elusen fel cyfranddaliwr yn yr is-gwmni

masnachu er mwyn hybu buddiannau'r elusen. Mae cyfarwyddwyr yr is-gwmni masnachu yn gyfrifol am ei reoli, ond yr ymddiriedolwyr, fel cynrychiolwyr y rhiant elusen, sy'n gwneud y prif benderfyniadau eraill. Er enghraifft, mae ymddiriedolwyr yn gyfrifol am:

- penodi/diswyddo cyfarwyddwyr yr is-gwmni masnachu;
- telerau gwasanaeth y cyfarwyddwyr, gan gynnwys unrhyw dâl; a
- pharhad, neu ddiddymiad yr is-gwmni masnachu.

## Ch18. All is-gwmni masnachu gael ei berchen gan fwy nag un elusen?

### Yr ateb byr

Gall. Nid oedd y math hwn o strwythur sefydliadol yn cael ei annog ar un adeg drwy waharddiad ar wneud taliadau Rhodd Cymorth gan is-gwmni masnachu gyda mwy nag un perchennog elusennol i'r perchnogion hynny. Ond nid yw'r gwaharddiad hwn yn bod mwyach.

---

### Yn fwy manwl

Gall un elusen berchen ar is-gwmni masnachu yn llwyr, neu gall nifer o elusennau berchen arno ar y cyd. Yn amlwg, yn yr ail achos, mae'n rhaid i'r elusennau dan sylw gytuno i rannu elw masnachu'r is-gwmni.

Mae'r sylwadau ynghylch mentrau ar y cyd yn nau baragraff diwethaf Ch9 yr un mor berthnasol i fentrau ar y cyd ag elusennau eraill.

## Ch19. All elusen warantu rhwymedigaethau is-gwmni masnachu?

### Yr ateb byr

Ni fydd modd gorfodi gwarantau o'r fath, os cânt eu rhoi, yn erbyn yr elusen a gall yr ymddiriedolwyr wynebu atebolrwydd personol.

### Yn fwy manwl

Gellir gwahodd rhiant gwmni neu ei ymddiriedolwyr i warantu rhwymedigaethau is-gwmni masnachu. Er enghraifft, gall banc yr is-gwmni masnachu fod yn amharod i ddarparu cyfleusterau gorddrafft i'r is-gwmni masnachu oni bai fod y rhiant elusen (neu ei ymddiriedolwyr) yn gwarantu rhwymedigaeth yr is-gwmni masnachu i ad-dalu.

Os yw ymddiriedolwyr rhiant elusen yn rhoi gwarant o'r fath, ac mae rhwymedigaeth o dan y warant yn cael ei gorfodi gan gredydwr yr is-gwmni masnachu, nid yw ymddiriedolwyr yn debygol o gael yr hawl i gael eu hindemnio o'r elusen, a bydd rhaid iddynt fodloni'r atebolrwydd yn bersonol, os:

- yw'r atebolrwydd yn deillio o fethiant masnach y mae is-gwmni masnachu yn ymgymryd â hi; ac
- ni allai'r rhiant elusen ei hun fod wedi ymgymryd â'r fasnach honno ei hun.
- Effaith syml caniatáu gorfodi'r warant ar draul yr elusen fyddai rhwystro diben cyfyngiad y gyfraith elusennau ar yr elusen yn ymgymryd â'r fasnach ei hun.

Os yw gwarant o'r fath yn cael ei rhoi gan riant elusen gorfforedig, mae'n bosibl na fydd yn ddilys o gwbl. Bydd dilysrwydd gwarant o'r fath yn dibynnu ar:

- ddarpariaethau cyfansoddiad yr elusen; a
- darpariaethau adran 65 Deddf 1993 (mae'r adran hon yn gymwys i gwmnïau elusennol, ond mae darpariaethau tebyg yn gymwys i gymdeithasau diwydiannol a darbodus elusennol). Disodlir y ddarpariaeth hon gan ddarpariaeth debyg yn Neddf Cwmnïau 2006 (adran 42).

Os **gellir** gorfodi atebolrwydd o dan y warant, a chaiff ei orfodi gan gredydwr yr is-gwmni masnachu, gall yr ymddiriedolwyr fod yn atebol yn bersonol i wneud iawn am atebolrwydd yr elusen gorfforedig o dan y warant, os:

- yw'r atebolrwydd yn deillio o fethiant masnach y mae is-gwmni masnachu yn ymgymryd â hi; ac
- ni allai'r rhiant elusen ei hun fod wedi ymgymryd â'r fasnach honno.

Yn ogystal, gall taliadau a wnaed gan riant elusen o dan warant o atebolrwydd is-gwmni masnachu gael eu hystyried yn wariant anelusennol, gan greu effaith treth a allai fod yn niweidiol i'r elusen.

Mae cofrestru 'grŵp TAW' sy'n cynnwys elusen a'i his-gwmni neu is-gwmnïau masnachu yn golygu bod pob endid o fewn y grŵp yn gwarantu bodloni rhwymedigaethau TAW endidau eraill o fewn y grŵp. Nid oes unrhyw wrthwynebiad mewn egwyddor i gofrestru elusen fel rhan o grŵp TAW. Ond cyn gwneud hynny, rhaid i ymddiriedolwyr fodloni eu hunain bod manteision cofrestrïad grŵp yn drech na'r risg o golled i asedau'r elusen, os

oes rhaid defnyddio'r asedau hynny i fodloni rhwymedigaeth TAW is-gwmni masnachu.

Yn gyffredinol, rhaid i ymddiriedolwyr geisio sicrhau y gellir dangos bod yr holl drefniadau ar delerau masnachol ac er lles yr elusen, ac nid ydynt yn creu'r trafferthion a nodwyd uchod.

### **Gwybodaeth bellach**

Gall gwarantu rhwymedigaethau is-gwmnïau masnachu fod yn faes cymhleth, a dylai ymddiriedolwyr geisio cyngor proffesiynol cyn gwneud unrhyw benderfyniadau.

## Ch20. All rhiant elusen a'i his-gwmni masnachu gyfuno eu cyfrifon banc?



### Yr ateb byr

Gallant, nid oes unrhyw wrthwynebiad mewn egwyddor i gyfuno cyfrifon banc er mwyn cael telerau busnes gwell gan y banc. Fodd bynnag, rhaid cadw strwythurau ariannol y rhiant elusen a'r is-gwmni masnachu ar wahân.

### Yn fwy manwl

Gall cyfrifon banc elusen a'i his-gwmni neu is-gwmniau masnachu gael eu cyfuno ar yr amod bod:

- cofnod priodol yn cael ei gadw o gyflwr y gweddillion yn y cyfrifon unigol sydd wedi cael eu cyfuno;
- manteision a beichiau'r cyfrif cyfunol yn cael eu dyrannu'n deg rhwng y rhiant elusen a'r is-gwmni neu is-gwmniau masnachu, gan ystyried cyflwr y cyfrifon unigol; ac

- nid yw cyfuno yn golygu bod gwariant anelusennol yn codi i'r elusen, sydd yn ei dro yn creu effaith treth bosibl, neu mae'r elusen yn dioddef anfantais treth fel arall.

### Gwybodaeth bellach

Gall trefniadau cronni fod yn faes cymhleth, ac mae cyngor proffesiynol yn cael ei argymhell, gyda'r nod o sicrhau y gellir dangos bod yr holl drefniadau ar delerau masnachol ac er lles yr elusen.

## Ch21. All is-gwmni masnachu ddefnyddio tir ac adeiladau ei riant elusen?



### Yr ateb byr

Gall. Ond rhaid i ddefnydd o'r fath fod ar sail gyfundebol briodol ac ar delerau masnachol priodol.

---

### Yn fwy manwl

Dylai unrhyw ddefnydd o dir ac adeiladau'r riant elusen gan is-gwmni masnachu gael ei gynnwys drwy brydles neu drwydded ffurfiol yr eiddo dan sylw o'r elusen i'r is-gwmni. Rhaid i'r is-gwmni masnachu dalu rhent neu ffi sy'n cyfateb i'r hyn a fyddai'n daladwy ar gyfer gosod yr eiddo ar y farchnad agored.

Bydd rhoi prydles, a gall rhoi trwydded, gael ei ystyried yn werthu tir elusen. Bydd angen i warediad o'r fath gael ei awdurdodi gan y Comisiwn oherwydd bod yr is-gwmni masnachu yn 'berson cysylltiedig' mewn perthynas â'r elusen. Os yw elusen yn prynu tir i is-gwmni masnachu ei ddefnyddio, rhaid cyfiawnhau hyn fel buddsoddiad o adnoddau'r elusen yn nhermau'r adenillion masnachu a dderbynnir.

Mae elusennau'n cael eu heithrio o dreth tir toll stamp ar dir a brynir (sy'n cynnwys adeiladau). Ond nid yw'r rhyddhad yn gymwys i dir a brynir gan is-gwmniau masnachu. Bydd yr eithriad hwn yn cael ei golli os nad oes modd cyfiawnhau prynu'r tir a'r adeiladau fel buddsoddiad o adnoddau'r elusen; neu os yw'n cael ei wneud er mwyn osgoi treth gan yr is-gwmni masnachu.

### Gwybodaeth bellach

Gweler canllaw'r Comisiwn *Gwerthiannau, prydles, trosglwyddiadau neu forgeisiau*: Yr hyn y mae angen i ymddiriedolwyr wybod am waredu tir elusenna (CC28).

## Ch22. All elusen buddsoddi'n anuniongyrchol mewn is-gwmni masnachu?



### Yr ateb byr

Gall. Mae buddsoddi anuniongyrchol fel caniatáu defnyddio amser staff ac offer swyddfa yn ddull pwysig o gymorth i is-gwmni masnachu. Fodd bynnag rhaid i'r elusen godi tâl ar yr is-gwmni, am werth teg, ar gyfer y gwasanaethau o'r fath neu am ddefnyddio cyfleusterau.

### Yn fwy manwl

Gall buddsoddi anuniongyrchol mewn is-gwmni masnachu fod cyn bwysiced i ddichonolrwydd yr is-gwmni masnachu â chyfalaf a ddarperir yn ffurfiol gan yr elusen. Soniwyd eisoes am ganiatáu i'r is-gwmni masnachu ddefnyddio tir ac adeiladau'r elusen (gweler Ch21). Gall buddsoddi anuniongyrchol hefyd fod ar ffurf y rhiant elusen yn caniatáu i'r is-gwmni masnachu ddefnyddio staff ac offer yr elusen.

Fodd bynnag, ni all buddsoddi anuniongyrchol gynnwys unrhyw elfen o roi cymhorthdal i'r is-gwmni masnachu, oherwydd byddai hynny'n atal gwerthuso perfformiad yr is-gwmni fel buddsoddiad mewn modd gwrthrychol. Gall trefniadau sy'n cynnwys yr elusen yn rhoi cymhorthdal i'r is-gwmni masnachu gael effaith dreth niweidiol hefyd oherwydd, yn gyffredinol, nid yw cymorthdaliadau o'r fath yn debygol o fod yn 'wariant elusenol' o dan Ddeddf 1988.

Felly, dylai'r rhiant elusen godi tâl am unrhyw wasanaethau a chyfleusterau y mae'n eu darparu i'r is-gwmni masnachu. Yn unol â hynny:

- Os yw staff a gyflogir gan yr elusen yn gwneud peth gwaith i'r is-gwmni masnachu, neu os yw'r is-gwmni masnachu yn defnyddio cyfleusterau y mae'r elusen yn berchen arnynt, rhaid i'r elusen godi tâl priodol.
- Rhaid talu costau o'r fath o fewn cyfnod rhesymol. Gall costau sydd heb eu talu fod yn fath o gyllido tymor hir arwyddocaol, a chael eu hystyried yn fath o gymhorthdal y mae'r elusen yn ei roi i'r is-gwmni masnachu.
- Fel rheol ni ddylai taliadau o'r fath fynd y tu hwnt i ad-dalu costau'r elusen; os ydynt, cânt eu hystyried fel derbyn masnach y mae'r elusen yn ymgymryd â hi, ac mae'n bosibl na fydd yr elw sy'n deillio ohono yn gynnwys i gael ei eithrio rhag talu treth.

Gallai trefniadau rhannu costau gael eu herio gan HMRC Elusennau, os nad yw'r costau'n cael eu cyfrifo mewn ffordd dderbyniol neu eu rhannu'n briodol.

Dylid defnyddio trefniadau o'r fath dim ond os yw staff a chyfleusterau yn cael eu rhannu rhwng y rhiant elusen a'r is-gwmni masnachu. Os yw staff yn cael eu cyflogi ar fusnes yr is-gwmni masnachu yn unig, dylai'r is-gwmni masnachu gyflogi'r staff. Os defnyddir offer gan yr is-gwmni masnachu yn unig, dylai'r is-gwmni masnachu berchen ar yr offer.

Rhaid ystyried yn ofalus trefniadau rhannu rhwng y rhiant elusen a'r is-gwmni masnachu, gyda'r nod o sicrhau nad ydynt yn amharu ar allu'r elusen i gyflawni ei hamcanion. Dylai ymddiriedolwyr sydd eisiau dilyn trefniadau o'r fath geisio cyngor gan eu cyngorwyr proffesiynol eu hunain a chysylltu â'r Comisiwn yn gynnar yn y broses.

Gall fod angen i rai grwpiau elusennau mawr iawn ystyried goblygiadau deddfwriaeth prisiau trosglwyddo hefyd. Os yw'n gymwys, mae hyn yn

gofyn am brisio trafodion 'hyd braich' o fewn y grŵp elusen at ddibenion treth, waeth beth fo telerau'r cytundeb rhwng y rhiant elusen a'r is-gwmni masnachu. Gall defnyddio pris hyd braich yn lle'r pris go iawn (at ddibenion treth) gynyddu derbyniadau masnach, cynyddu elw'r fasnach, gan felly creu atebolrwydd i dalu treth. Dylid nodi nad yw HMRC Elusennau yn disgwyl i elusennau gomisiynu adroddiadau prisiau trosglwyddo drud fel rheol, ond dylai elusennau fod mewn sefyllfa i ddangos bod y trefniadau ar delerau masnachol (hyd braich).

### **Gwybodaeth bellach**

Fe welwch arweiniad HMRC ar ddeddfwriaeth prisiau trosglwyddo mewn llawlyfrau a gyhoeddir ar ei wefan - INTM 432090. Dylid ceisio cyngor proffesiynol os yw'r arweiniad hwn yn achosi pryder. Bydd HMRC Elusennau hefyd yn ateb ymholiadau penodol am ddeddfwriaeth ac arferion, ond ni all gynghori ar gynllunio sy'n gysylltiedig â threth.

## Ch23. Sut gall is-gwmnïau masnachu gael eu henwi?

### Yr ateb byr

Dylai enwau is-gwmnïau masnachu fod yn wahanol i enwau eu rhiant elusennau er mwyn osgoi dryswch hunaniaeth. Mae'r gyfraith cwmnïau hefyd yn cynnwys cyfyngiadau eraill ar ddewis enwau.

---

### Yn fwy manwl

Y brif egwyddor wrth enwi is-gwmni masnachu yw bod hunaniaethau gwahanol y rhiant elusen a'r is-gwmni masnachu yn glir i bawb dan sylw. Felly dylai enwau'r rhiant elusen a'r is-gwmni masnachu fod yn wahanol er mwyn osgoi unrhyw ddriswch rhwng y ddau sefydliad.

Fodd bynnag, gall enw'r rhiant elusen gael ei gynnwys yn enw'r is-gwmni masnachu, ar yr amod nad yw hyn yn rhoi'r camargraff i'r rhai sy'n delio â'r is-gwmni eu bod yn delio â'r elusen ei hun. Er enghraifft, byddai'n dderbyniol i enwi is-gwmni masnachu fel 'Cwmni Gwerthu [enw'r elusen] Cyf'.

Mae'r gyfraith cwmnïau yn cyfyngu ar y defnydd o'r geiriau 'elusen' ac 'elusennau' yn enw unrhyw gwmni - rhaid ceisio cymeradwyaeth y cofrestrydd cwmnïau ar gyfer eu defnyddio. Fel rheol dylai'r geiriau hyn gael eu hosgoi yn enw'r is-gwmni masnachu ac eithrio pan fyddant yn ffurfio rhan o enw'r elusen ei hun, ac mae'r enw hwnnw yn cael ei integreiddio yn enw'r is-gwmni masnachu.

# Diolchiadau

Mae'r Comisiwn Elusennau yn ddiolchgar i Gyllid a Thollau EM ac i'r unigolion, elusennau a sefydliadau eraill sydd wedi helpu i ddatblygu ac adolygu'r canllaw hwn. Mae'r Comisiwn hefyd yn cydnabod gwaith James Tickell ac Oliver Tickell a'u cymorth wrth ddrafftio'r fersiwn hon.





Mae modd cyrchu'r cyhoeddiad hwn ar wefan y Comisiwn Elusennau hefyd: [www.charitycommission.gov.uk](http://www.charitycommission.gov.uk)

© Hawlfraint y Goron 2010. Gellir atgynhychu'r cyhoeddiad hwn yn rhad ac am ddim mewn unrhyw fformat neu gyfrwng ar yr amod ei fod yn cael ei atgynhychu'n gywir ac nid yw'n cael ei ddefnyddio mewn cyd-destun camarweiniol. Rhaid cydnabod y deunydd fel hawlfraint y Goron a rhaid nodi teitl y cyhoeddiad.

Gallwch gael fersiynau print bras o'r  
cyhoeddiad hwn gan y Comisiwn  
Elusennau ar 0845 300 0218

**Comisiwn Elusennau**

Ffôn: **0845 300 0218**

Typetalk: **0845 300 0219**

Gwefan: **[www.charitycommission.gov.uk](http://www.charitycommission.gov.uk)**